

味檠齋文集
二



味 檠 齋 文 集

(一十)

趙 南 星 著

味槩齋文集卷十二

墓誌銘

明文林郎吏部文選清吏司主事前福建江西道監察御史翰林院庶吉士柱石王公墓誌銘

王公諱之棟字養隆別號柱石安定公之長子也安定公諱克愼娶周孺人生公幼卽能文學使者陳公見其文異之及見之童子也大異之首以補邑弟子員無何開府溫公延安定公爲其子師與公同學溫公又大異之公學於安定公無他師深思廣覽厲不臥不休之志乙夜燈熒熒窗牖間王公憫其過勞戒之則掩其燈待王公臥攤帙如故三年而文大成曰是可以取青紫無疑矣壬午果魁畿輔明年成進士選爲翰林庶吉士乙酉出爲福建道御史視東城人不敢干以私豪斂俠竄肅如也出按宣大宣大之總戎者人皆謂其連天蟠地之勢不可動搖公抗疏言其不法上爲之奪俸示懲又上疏請立東宮不報徐尙寶貞明少而讀邱文莊之書信之謂燕趙魏之間有水者可開田種稻而深州等處可濬渠受潯沱水滋灌溉鄭白之績可興遂建議得旨以尙寶兼御史領其事行郡國督責北方地高水深必不可稻而一二有司言所開水田若干穫稻若干尙寶首薦之而薊門以東募南兵教民種稻甚橫至淫人婦女幾爲

變。王公上疏極言其不可十二事。上從公言罷之。息民省費。遏絕亂萌。厥功甚大。公以是名益重。出按淮揚。未幾請告歸里。再入補江西道。是時陸公光祖爲冢宰。起舊中丞趙公錦爲刑部。趙公者嘉靖中爲御史。出按雲南。論劾嚴嵩。械繫下獄。削籍者也。公論劾太宰。到任纔一日。卽起用錦。錦年七十六老矣。又遠在數千里外。司寇民命所係。不仰體皇上欽恤至意。而恣行胸臆若此。疏上。政府擬旨詰責公。名德老成。謂不可用。其具言欲用何人。公上疏言。臣第言其老不可用耳。輒問臣以欲用何人。設臣言事之不便者。卽當問以欲行何事。臣何以置對。是欲籥臣下之口。不敢復言。非社稷之利也。公竟謫交城尉。尋陞潞安府司理。公爲司理。卽屹屹思職。抑強暴。振冤滯。不左遷視之也。其年陞禮部主事。改銓曹。聞安定公病。請告歸里。無何安定公歿。公幾爲死孝。政府自江陵而後。稍不敢擅權。而欲諸司奉頤指。然人知守官。太倉諸人不能堪也。則挾主威以摧折之。甚於江陵。得罪者不下二百人。戊戌新建當事。以曹給事薦銓部廢者。乃丐旨貶黜多人。而公在黜中。公始聞一笑。後遂忘之。讀書教子。時與故舊飲酒賦詩。陶陶乎有餘樂也。公自成進士。先世之產。悉以與諸弟。而自買田於邑南之曹莊數百畝。子女多。不足以餬口。常釀黍將爲酒。無米漉之以炊。客至無薪。以枕中草爲爨。公不憂也。惟竭力以奉養太孺人。時不能具甘旨。乃怛然不樂。然絕無欲仕之意。當道者過其間。非素交不得見。福清秉政。銳意欲起廢。然謁譖已深。不能拔。屢推公尙實。不報。公病竟不起。病革時。謂諸子。修短有定數。無所恨。惟國恩未報。太孺人尙在。不意先朝露。此

終天之恨。嗚咽而逝。公生於嘉靖癸丑二月二十五日。歿於萬厯庚戌七月初一日。春秋五十有八。子元佐等。以是年之十一月一日。卜葬於石柱里之先塋。以牛孝廉之所爲狀。屬志銘於趙子。趙子曰。王公與余至深。其在朝時。尙未與余交也。與余交者。必不劾陸太宰。陸太宰知人。而深沈有執。前後爲太宰者。若宋陳孫蔡四公皆賢。然無能過之。其去邪甚密。而斷臺省多恨之者。王公天性樸直。聞義必爲。其言趙公老不可起。騷矣。至詆訾陸太宰。蓋聞之人。無私心。是以縉紳亮之。而趙公強出。斃於中途。虧損夙望。可歎也。往者郭華伯之堂弟。爲酷吏孫姓者捶死。實有窮奇之助。號爲同袍者。惟王公有匍匐在原之誼。余以爲若王公者。稱忠臣烈士不虛耳。卽其仕而能貧。亦天下所少。余視公疾。問其家。米不滿一斗。汲直范萊蕪。何以加焉。銘曰。

帝有醉耶。何其泯泯。胡俾鬼伯。崇此淑人。胡俾儉邪。翳此貞臣。懲腸婦舌。昏楮是因。元愷放流。林野成羣。衣荷纓薰。攝僕不伸。繫天馬足。以罔獲逞。藪藪有轂。終窶且貧。此曷不弔。彼視而存。公已焉哉。遺茲世紛。美人俱老。幽壤多鄰。英雄異代。與歎斯文。

明奉政大夫戶部郎中胡公墓誌銘

胡公諱三省。字子唯。別號一齋。先世山西平陽人。九世祖鈞祥。徙居沙河。鈞祥生浩。浩生文達。正統辛酉。舉於鄉。仕爲廣文。文達生醫學正術貴。貴生諸諸生博。博生績。績生邦俊。是爲公父。以公贈

奉政大夫戶部郎中母宋贈安人胡公生而豐盈厚重。動協矩矱。父甚愛之。曰。吾家世業儒。未顯。意者其在此子乎。移居郡城。以求師取友之便。公沈潛含照。篤志問學。日引月長。超踰儔輩。甫遊庠泮。卽以文詞著聲。郡守劉公應節。當世瑰碩。少司馬趙公孔昭。鄉國弁冕。皆重其文質。以爲必大受。隆慶庚午。公將赴大比。而有司爲貴人豎坊。度其地於公之門。公請移之。弗許。公曰。吾豈免於貴耶。是秋果舉於鄉。明年上春。官弗第。則之山西聖水寺。謝絕人世。殫心典籍。肆力探討。癸未成進士。試宰陽穀。惻怛愛民。務在安靜。不燒。與之休息。嘗喟然歎曰。古教養之法。蕩然無復存於今者矣。惟勸農桑。興學較。猶有其遺意焉。吾惟耆年乎此耳。久之。陽穀底甯。又畫爲均賦之法。未及行而調洪洞。此時洪洞人饑饉。又患痢。公多方賑給。粥虛藥病。若怒若瘳。民得以免於捐瘠轉壑。未幾而歲登人和。公所以治洪洞者。大都如陽穀。而所立均賦之法。後令尹行之。迄今稱便。上官以公治行。漢循良不過也。屢薦之。而奉宋安人之諱。泣血跣歸。民號哭而送者以萬數。服闋。補遂平。遂平。汝南之疲邑也。公視事未期。而四境改觀。他邑之訟失職者。聞公平恕。皆願質成。公所振理冤抑。如唐河等甚衆。有恨公反其成案者。公若弗聞也。曰。殺人豈細事哉。而可雷同爲也。邑有懸瓠石洋之川。築長隄於郎家口。而滔陸之害永息。大抵公爲邑主。平易便民。不務卓鷺揮霍取聲名。不能柔橈瞞世。與流俗之意殊。是以士民之愛。深於上官。去後之思。纏而弗忘。公不得爲臺諫。入爲戶部主事。未幾以父憂歸。起復。爲戶部郎。督餉薊門。時倭奴躡朝鮮。朝廷大徵郡國兵援之。有陳將

軍者。兵過薊門。人甚怨其搜牢。公趣之去。而管山海關者爲兵部張公棟。公移文禁戢。仍共上章論劾。朝廷爲易置大將。疆宇懾然。公資望日高。是時章奏率多停閣。銓部尤甚。擬陞公太守及參藩。皆不得旨。公聞子嘉遇病。遂請告歸。構佚老堂。夢覺庵。有終焉之志。無何嘉遇亡。少子嘉勳殤。舊疾日劇。竟不起。公勞苦砥礪。履繩弗跌。稍有出入。悔責不能自容。橫逆之來。倖然順受。邢趙之間。號爲長者。奉身易足。仕宦惟取俸祿。自薊門還。署有羨金二千。米千石者三。毫顙不取。先是公鄉舉時。邑例有司爲斂米百石。公力卻之。其修潔蓋出天性焉。公卒之。又明年。是爲丙午。子嘉謨將以四月十一日。卜葬於城西之新阡。嘉謨求銘於趙子。趙子問公里居狀。曰。家大人甚不樂。有時半夜起。呼諸子共飲酒求醉。趙子曰。何以如此。曰。以趙廉憲事。廉憲治兵薊門。而黠盜熊應士等。僞稱剽倭之兵。廉憲弗覺而牒之。家大人與之餉金。事露。不能爲掩覆。廉憲與家大人素厚。以是爲負。而自詭。趙子曰。此余門人趙山甫者也。賢者也。弗覺盜。公罰耳。厥後有齟之者。山甫以墮官。公之弗樂以此耶。細故小言。傷茲二賢。痛哉。然胡公之於友道。可謂敦矣。公生於嘉靖甲辰云云。銘曰。

胡公之碩。丁時不融。以郎署終。胡公之懷。遇人不淑。俾厥心戚。胡公之仁。受命不將。六十以亡。伏清死直。泉壤之輝。胡公其綏。

明亞中大夫福建都轉運鹽使司運使理南盧公墓誌銘

盧公名大順字子達別號理南始祖德故山右人而徙於永平之劉營鄉高祖全全生昌昌生麒麒生廷珠是維盧公之父海遺公盧氏世農皆仁厚有古風至海遺公治博士家言以目疾舍業然至老好典籍盧公兄弟竟用其教起家爲名人海遺公以盧公貴贈戶部主事配楊封太安人盧公於兄弟中季也長臨洮府推官大節次淮安府同知大謨次南兵科給事中大中弟汾陽丞大道公少無童心從臨洮公學自能黽勉早爲諸生有聲兄弟自相切劘時海遺公躬勤家政得博精其業又立橫舍延四方英儁廣麗澤之益以是所詣日超丙子公與淮安公同舉於鄉庚辰成進士尋奉海遺公之憂以歸癸未給事公亦成進士公出爲戶部主事司倉悉卻姦弊權稅崇文門寬於負販有貂貴攜重貲欲匿公力拒之丁亥督餉江以南道出金山適有惡舟於江者公損金募救活數十命所至砥節圖書之外無一長物吳中諸貴人以公仁厚願得爲二千石事已而奉楊太安人之變公以兩大人之變皆未得在側爲終天之恨然生事死葬祭皆盡心禮士稱紳之服闋復補戶部辛卯爲蘇州守吳中果得公爲守矣然其中多貴要有司不得盡行法有市豪周天爵者求爲泚墅鈔關庫吏賕一翰林鉅直指甘公爲言公竟不從中貴張暹奉仁聖太后旨持佛像至吳中置郡城獅子菴欲墜其地僧明旺遂毀民舍數十家公捕僧置之法暹昇像去常熟有妖僧右海者鄉紳錢氏之客僧也居其別業據高座說法用幻術誘惑男婦數百人諸司不敢問公以計擒斃之稱快者多然亦多愧恨者舉人金元煥以人命當大辟諸薦紳皆爲力請求免公一無

所聽。而王元美司寇之子士驪。趙少宰汝師之子開美。有司以其謀不軌。密告朱開府。所引批諸郡邑子弟甚衆。蓋其士大夫讎二公者所爲。欲覆巢碎卵無遺種。而朱聽之下郡捕治。公心知其枉。無論二公名臣。卽無辜多人。亦何忍駢戮。未幾他郡悉繫所告。朱以屬公。公訊之無事實。竟白朱公釋之。所活人甚多。彼未棄其毒。而怨者亦不少矣。會以逸囚論調。丙申。調汾州府。汾州府故州也。以宗室強難治。故升爲府。公初入境。諸宗民值公出。故逆顏行嘗之。公嚴爲懲戒。怙終者以法繩之。於是良民不被其虐矣。永甯故石州。殘於兵者也。公以民不知兵。作備邊事宜一書。傳檄郡屬募兵。又多作戰具。於城垣起懸樓。藏之。平遙距南關驛有間道。敝隘不可行。公鳩工率衆。鑿山夷塗。亭館基置。輶車得通行焉。公政聲甚美。然以吳中貴要之憾。僅移福建鹽運使。鹽運稅額。福建不足當淮浙三十之一。而中貴權縉者。每掣驗。需索無已。商不能堪。公挺身爭之。中貴不得驗於商。庚子入覲。商民涕泣攀略。不忍舍。已而以浮議解位。或曰亦吳人之所爲也。公飄然而歸。讀書課農。教子睦族。一切無所嗜好。然有以自樂。欣欣如也。居久之。兩兄皆解組歸。而給事公之歸也。以直道忤時。新建爲蝎。譖害之。公兄弟故友愛。財產不析。至是日相聚。聚輒具酒食。果隋劇談。醞酌極歡也。時或方車並騎以遊。就景物。訪親舊。鄉人羣觀歎羨之。或舉手加額。呼如來。公兄弟謙柔接物。好施予。是以衆心悅豫無此。公平生矜重。卽病中延醫。亦肅容待之。公生於嘉靖二十八年四月二十日。卒於萬曆三十九年十一月二十三日。得年六十有三。配蘇云云。至是恢允爲狀。持給事

公書屬趙子爲誌銘焉。趙子曰：余嘗見盧公，恂恂溫溫，望之而知其仁人長者也。乃其爲守，不畏彊禦，夫文武不備，良民懼。盧公兼有之矣。卒不獲大用。昔海忠介公爲吳中開府，抑強禦，恤榮獨，彼中人嗾戴，給事鳳翔劾之，調南京倉場侍郎。而言者以南京不必用倉場，革之，使海公無可調。衆怒難犯，而况衆貴乎？盧公之坎壈宜矣。然盧公品自高，又有陰德，恢允之所爲狀，事核而文斐，才與孝具可觀也。盧氏之後福，豈有涯哉？銘曰：

仕路之險，過於羊腸。同類之恭，甚於貂璫。嗟噫盧公，仁厚而方，不虐昆蟲，不避虎狼。仕有正道，退有舊鄉。兄弟子姪，靡匪賢良。彼婦之口，可以徜徉。皎皎者日，皚皚者霜。想見伊人，何存何亡。

明奉直大夫大理寺正劉公暨配彭宜人合葬墓誌銘

劉公名邦彥，字士美，別號慶泉，世縣楚之龍陽。正統間名源者，以明經爲太學高等，隱居授徒，生必遠爲諸生，傳其家學。四子俱爲諸生，長鳳，食廩未仕，而與詩酒人結社香山寺。學者稱香山先生。香山先生生煥，是爲月溪先生。少卽有聲諸生中，博學至性孝友，慕古賢豪之誼，不屑問生產。嘗有醕酒而冒之者，先生疾趨避之。其人醒，肉袒來謝曰：無有，其人愧感，終身不飲。鄰人盡室患疫，親戚無敢造門者。先生朝夕爲視醫藥，皆得全活。娶高安人，生慶泉公。七歲卽從楊滄山先生受詩，十歲而能屬文。十二而父見背，母子相依，貧甚，當給里役。縣令薛公奇其貌，試以文，更奇之，遂復其身。無何爲諸生，學於蔣道林先生，甚見

器異。試輒居首。事母盡色養。時公已食廩。甘旨可供。娶彭宜人。彭宜人性孝。克盡婦禮。公得內助。益專精學問。聲譽隆隆起。公於聖人之道。真有所悟。從事慎獨。而灼見天地萬物之一體。是以出言必成文。舉足必成儀。其獨居無不學也。無不樂也。其於人無不敬也。無不愛也。急人之難。如在其身。學使者顏公鯨。名儒也。其教以行爲主。謂全楚之士。語好修者。以公爲最。卽文章亦罕有逾之者。當此時。公之名極重。然秋試屢躋。至甲子而八矣。乃舉於鄉。明年乙丑。當計偕。以母春秋高不往。其夏高安人棄養。公幾不勝喪。葬祭極誠信。廬墓三年。冢上生五色芝。隆慶戊辰。上春。官不第。爲樂亭廣文。士人宗仰之。明年己巳。擢令高邑。時高邑大水。自城郭以至官寺學宮。無不傾壞。田爲污萊。公修繕撫恤。舊邑維新。公材術瑰異。而依經篤古。安雅好靜。刻木爲阜隸。持牌而書其上曰。勺水不飲。一錢不索。訟者至庭。輒以與之。令自勾攝。願孀息者。輒罷遣不問也。邑田多隱匿之弊。公引繩分區。每若干畝爲一區。親量之。而賦役均平。行唐民告之當道。請公爲均田。至今賴焉。其處事有法。而貫之以實心。故政無不舉。而閭閻按堵。尤加意教化。時爲諸生談經講藝。其簞貧不能婚葬者。捐俸以資之。先是敬一亭在講堂之前。公曰。是茅塞之象也。移之西偏。鄉村皆有社學。延師儒以教童子。作幼學訓規班示之。而樵夫聞禮樂之談矣。又選擇民之拳勇者。籍爲鄉兵。而時操練之。久之皆善武藝。明紀律。高邑之鄉兵。聞於遠邇。當道之薦公者。以公有文武才。居三年。考最。贈父母如其官。彭爲孺人。壬申。調遷安。遷安邊邑。將吏羅仲先等。與敵媾釁。當道者屬公按其事。公

單騎往宣國威信敵爲氣懾。明年萬厯癸酉入補廷評。無何而以彭宜人病請告歸。宜人竟不起。乙亥出補丁丑轉寺副。以覃恩復加贈父母。今官彭成安人。無何爲寺正。平明之聲甚著。辛巳奉命恤刑於蜀。道出恆山。至趙州柏人之間。高邑士民無老少。富者持榼醪。貧者徒手往迎之。如唐子之得二親也。入蜀遂遭疾卒。公宰高邑時。俗猶樸陋。相襲之弊。一切澄汰。邑士恆數十年一舉於鄉。自公興起學較。移敬一亭之夜。公夢亭中有前代名臣之像。自是科第日盛。海內率知北方有高邑。公之功大矣。其將之遷安也。舉邑號泣不能留。而爲之立生祠於北門之外。畫像而祀之者數十家。彭宜人同邑士彭公伯陽之次女也。婉孌而敬。勤儉而才。常劉公貧約時。既養母。又好賓客。五肉七菜。恆若有餘。及其既貴。冠珠衣錦。而自奉率薄。彌敦素尚。宜人之歿。公不復娶。念糟糠之義。以同德之難也。宜人葬於城東雀門山祖塋之畔。至庚寅八月七日。中山大夫兄弟卜葬公於城南三十里小塘港之陽。乃遷而合葬焉。公生於嘉靖丙戌。十月四日卒於萬厯辛巳八月五日。享年五十有六。宜人生於嘉靖丙戌九月七日。卒於萬厯癸酉十二月二十八日。享年四十有八。女一。適同邑江山廣文王惟謙。男二。長應。閩之歸化廣文。次悉。卽中山大夫繼城令。及中山考最。再贈公奉直大夫。彭安人爲宜人。孫四。彰愛。禮部儒士。娶某氏某女。彰欽。邑廩生。娶某氏某女。彰德。娶某氏某女。彰寬。娶某氏某女。俱諸生。而彰欽爲中山嗣。曾孫大定。大安。大宥。大甯等。幼公與宜人墓尙未有誌銘。中山大夫以屬趙子。趙子曰。公之宰高邑也。余師之。公擊賞其文。以爲必遠詣。修學

既成。曰：如形家言驗者。趙子其翔乎。明年而余果舉於鄉。佩公之教。以獲簪朝列。不至頽壞。自惟無可以報。乃中山大夫爲令爲守。皆近高邑。得數相見。而公之墓未有誌銘。若待余爲之者。非余爲之其誰哉。銘曰。

靈均之里。吾師以降。允迪中和。溫溫其恭。惠流鄆上。趾美桐鄉。再試邊邑。屹爲保障。廷尉敬刑。咸平有慶。展也德人。天命不將。十載單栖。先隕其凰。結念冀野。矢靡他伉。有美仲子。來仕舊亢。襲蘭繼蔭。豐積彌芳。天寵洊至。賁於幽堂。公之弟子。鄆趙考功。勒銘貞珉。垂之無疆。

明故山東新城令鴻溟馮公墓誌銘

萬厯四十一年癸丑十一月八日。新城令馮公卒於官。趙子聞之曰：甚哉民今之無祿也。掌民者大率冒沒於賄。夷櫬其民。孰有厲操敷惠如馮公者乎。駕公令新城甫朞而卒。其病以勞於吏事。瀕危。大司馬王公授之禁方頓起。然不能節勞。復病。遂不起。病再危時。鄉老先生至榻前視之。曰：公病殆不可諱。公貧甚。何以爲後圖。盍取帑金若干佐急需。後至者彌之。是在生等無慮。公從榻上叩首。長者意良厚。第不肖。旣不能奉職。爲邑利益。溘焉朝露。而又牟非所有以辱長者。此萬萬不敢。於是諸老先生泫然歎息而去。嗟乎。世之人老卽貪得。而況其將死乎。蓋人有其主在患而不可死者。或謂之曰：子尙可以見人乎。曰：子以爲死尙可以見人乎。夫世之人知死之不可以見人也。而不知污垢而生之不可以見人也。而況其將死乎。

何所不可爲。若馮公者。可以長見人而竟早死也。何哉。公初授新城。謂余曰。邑多鼎貴。稅難完。僕材拙。恐得罪。奈何。余曰。是多君子。公君子。必有合也。至則羣公皆見而敬愛之。視事未幾而逋賦完。曰。正供易入。訟者悅曰。孚而弗鍰。市者樂奉。曰。賈平而弗稽。役者樂供。曰。與私雇等。於是邑之人。僉曰。馮公廉而愛。君子曰。馮公垂危且廉。况平居乎。父母之於子。未聞有腴削者。愛故也。故廉者必愛民。作吏如馮公者。豈不甚稀鮮哉。公病革。民皆爲禱之於神。其卒。皆搢膺痛哭。靈之歸。號而送之者數十里。非愛曷以至此。公自少而孤。事母趙以孝稱。先世所遺產無幾。弟時豐析居。遂不能餬口。公時時絕所有周之。其待宗族故舊甚篤。與人一以赤心。而博愛喜施。內外無怨。公以丁酉舉於鄉。壬子出宰新城。馮氏之先在柏鄉可考者。自三老公始。三老公生進。進生剛。剛生昇。昇四子。振敬起信。振生勳。勳生錫。馮氏之業儒自敬始。敬以太學仕爲典寶。錫有名諸生。早卒。而典寶公之孫爲濮州守。爲朝城丞。濮州公之子。卒於太學者。是爲余外父。太學公四子。皆諸生。仲。仲昌。先馮公舉於鄉第一而卒。馮公與濮州公。仕皆不久。馮氏世學。人皆信厚。而進取罕利。且不壽。此子長所以致疑於夷跖也。公歿未幾。直指耿公鳴雷。新城人也。持斧來恆山。每至柏鄉。卽召問其兄弟子姪。厚恤其家。公諱時彥。字應美。別號鴻溟。兄長時登。卒於諸生。次時捷。典寶。次時成。諸生。弟則時豐也。娶楊三子。曰嘉璠。娶隆平諸生李克念女。曰嘉瑜。娶賈曰嘉璨。娶劉嘉璠有三子一女。公生於嘉靖丁巳十一月二十七日。卒之時年五十七耳。嘉璠卜以乙卯之三月九日。葬公子氏莊之

祖塋銘曰。

生今之時。其德孔淳。爲今之吏。克愛而貧。享年不永。厥志莫伸。旅魂西歸。寐於茲墳。

明故封文林郎雙洲馬公墓誌銘

馬公諱壽高。字祖遠。別號雙洲。其先固始春河人也。有名敬先者。耕於龍岡之上。以迄於瑞。皆蠶野隱。修有老人登岡望之曰。此世有老壽。後當有顯人。贈瑞玉環二。瑞公父也。娶謝生山。復娶張生公。時父五十。九矣。年八十五卒。公少而失怙。二三族慝。日虓闕公之膏腴產也。則羣慝伯氏訟爭。母謝有豪賢之度。能忍。公奉教以雅遜消冤侮。先是公父始卜居城中。公奉母仍村居。就田園力作。母劬心織紉。生業漸饒。子元甫生而挺秀。見者奇之。公每曰。老人之語。此其符矣。母八十始還城居。公意視神聽。承歡多方。母見其克孝。念昔時不造。淚輒泫然下。卒。居喪甚哀。遠邇感動。元甫成童。隆師命學。身居田間。管農事。歲一再入城。視元甫學。已而元甫補汝南弟子員。卽有英聲。其人眉宇雄稜。意氣慷慨。亭亭矯矯。於風塵中特起。非獨其文詞之奇也。是時大中丞三原溫公分守汝南。愛之。居門下。一時有位。罔不聲折禮遇。而里中有二開府。張公社。廖公逢節。皆賢者。皆與馬公深交。卒締姻好。元甫竟成進士。筮仕得廬州司理。跪求教。公曰。爾以先人之德。幸爲官。夫官善得之以興。惡得之以壞。吾見進士多矣。爾往慎之哉。吾不求富。賴先人之遺業。吾不貧矣。祿食者豈患餒哉。無扞於利。爲祖父子孫僇辱也。慎之哉。元甫俯伏受教。竟能砥礪致身。

於當世豪傑之林。公嘗跨驢羸服至廬州。欲問元甫治狀。元甫廉能之聲。震動江淮間。行道之人。無不極口而稱。舉手加額而祝者。不待問而言。而是時六安李公懋檜。與元甫同志。偵公過。有所饋遺。不受。公以元甫三年攷最。封文林郎。如其子官。每言國家待臣子厚如此。曷忍負之。於時春河橋圯。以租三百助工。曰。聊以報國恩萬一云。元甫治行。於一時無右。然所交皆天下豪傑。其分別善惡。是非著明。流俗畏之。僅稍遷比部。其北上也。武平指揮周姓者。感元甫之德。以三百金爲馬。太公壽。卻之。元甫繇比部改祠部郎。無何而督學江西。江西士故尙氣節。元甫至。無不悅服者。無何而以母憂歸。乙未。計吏罷官。報至。公曰。曩者直指之事。吾固知不免也。人臣抗節守法。於心無愧。官何足道哉。蓋元甫在比部時。有議及江西直指。簠簋者。上將使往覈其事。大中丞涇陽李公。素知元甫。薦之。元甫竟以實報。於是惡之者衆矣。故大計不免。公晚年幽栖逃世。戒家人無所關說。於城西白水溪頭。建淨心山房。禮佛供僧。癸巳大饑。煮鬻飢流亡。穎汝之間。生活數千人。親舊困窮。不惜倒囊濟之。卒之先數日。施金二百。爲小河橋。公生於正德己卯三月二十六日。卒於萬厯壬寅十二月二十一日。娶元配陳孺人。及羅孺人。及劉二子。長猶龍。卽元甫。娶宋次亦龍。娶單女五。長適諸生田兆。次適姜有禮。次適吳學蘇。次適敖修道。次適孫可欲。孫五人。之騏娶徐之驢。聘朱淮玉女。之馭聘諸生吳東魯女。元甫出。次之驥。聘許孝廉麗女。次之駒。聘段封君偉女。亦龍出。孫女六人。長適諸生孫夢庚。次適孫以孝。次許聘朱某。次幼。元甫出。曾孫二人。世清聘諸生易可居女。世

忠聘李孝廉自築女之騏出曾孫女一人許聘張開府曾孫衍祚趙子曰世實生人能無世情蒼素混淆賢者所歎馬公以元甫爲子而厥官乃墜安得不鬱伊乎異哉乎當事之言也曰吾將黜夫假仁假義者用此以芟刈名人卽如所云眞貪眞酷者豈盡去哉有識者安得不鬱伊乎非馬公不生元甫賢豪豈易得哉世多以爲患何暇愛惜之乎余爲馬公墓銘蓋不勝其歎息焉銘曰
馬公逝矣逝於何所笑與歎與於誰告語日傾光虧直士見醜皇天不揆孰測后土屈賈之徒其人在否魍魎魍魎則謂公慚德無屈伸豈華臙神靈菁菁其芳萬古

明贈奉直大夫知州張公暨配滑太宜人墓誌銘

趙州張公以隆慶三年己巳春二月二十三日卒其年十月二十日卜葬於州城南祖塋之西其子伯簡爲狀而未有銘也至於今三十四年矣是爲萬厯三十年壬寅八月初四日公配滑太宜人卒於是公之孫駒將以是年十一月十五日合葬乃以伯簡所爲狀及所爲太宜人狀來求銘嗟嗟余未及見張公也然嘗拜滑太宜人焉余弱冠交於伯簡及其弟叔廣至深千里又從余遊伯簡未乞公銘以太宜人在意有待乎假令不先逝者銘亦必余屬也張公諱時泰字道行別號活泉其先居州之白溝驛曾祖通移居城中通生山山生暹暹端介有韜誥鄉閭重之娶閭年四十未有子不肯置妾閭力勸之娶高生公六歲求婚於滑翁滑翁愛公器字許之越明年公父卒二母嫠居家日益貧及娶滑太宜人滑公憐其單子移

公之大石橋同居焉。滑翁明陰陽形家之術。以教公。既成。恥之棄去。從故縣令王公棟學易。會以修城役於州。公帶經往。守見而異之。即放歸。學易一年而王公卒。家遭火。資用都盡。無書可讀。公喟曰。天乎。豈不欲余儒耶。然庸詎知非孟子所謂動心忍性者乎。鄰舍生有爲春秋者。乃借春秋讀之。時伯簡生三月。公抱之讀。使滑太宜人專紡績。以給衣食。然多區蓋之義。力不能求師。而里中有王公一槐者。曾爲縣丞。家居。以春秋授徒。健公之志。試以文。甚期許之。收置門下。公聞一言。即竦意而聽。見一字。即手書於牘。以得之難。惟恐失之。其學備極勞苦。嘉月良辰。罔知休暇。以是精於春秋。當此時。北方人士。憚春秋難通。鮮爲之者。公始發憤力攻。竟爲名士。父子三人。皆以春秋取科第。趙春秋生通者。多其弟子。公二十五。乃就有司試。學使者王公賞其文。以應鄉舉。不售。補增廣生。明年食廩。自是每試輒高等。然轆軻至四十。乃舉於鄉。是爲嘉靖甲子。又三年丁卯。伯簡即舉於鄉。甫弱冠耳。而叔廣亦已爲諸生。熒熒見光氣矣。公起於孤寒。尊節抗行。屹不可捫。故事。舉於鄉者。州守爲之醺金三百以贈。公笑曰。吾昔嘗饑凍。一介不苟取。今策名天府。乃箕斂鄉黨耶。固不受。公之姪居正。幼孤。公收而子之。若已出。他姪有兄弟爭田鬭者。族人請扑教之。公持杖而泣。良久。投杖於地曰。奈何以田故。失骨肉之和。又傷及父母遺體也。姪遂感悟相愛。公刻意砥行。雖閭室之中。皆有箴銘。久之。比集爲修省錄。嘗言士固窮而後能慎位。清心而後能效忠。有味乎其言之也。其用於世。必有可觀者。再舉進士不第。齋志以歿。距其生嘉靖三年八月初八日。僅四十有六。

耳。以伯簡守華州。績最。贈公如其官。而滑太宜人受今封。滑太宜人自少而與公食貧。鉛槧機杼共一室。遂能通儒書。解大義。伯簡童時。公恆出授徒。則從太宜人受書。及叔廣能讀書。公乃不復出。公歿後。太宜人教二君甚嚴。數稱爾父少孤寒。極苦。竟成名。天固不負人。爾輩饒衣食。何忍怠惰。不念先人乎。太宜人見伯簡久不第。命之仕。謁選得華州。則迎之華州。遷同知鞏昌。則又之鞏昌。無何伯簡遂守鞏昌。太宜人居則翟冠而霞衣。出則耳車而盛儀。而伯簡爲華州時。叔廣已舉於鄉。又無何而其壻屈孟昌亦舉於鄉。孟昌少而從公治春秋者也。又無何而叔廣成進士。爲高平令。以不能事貴人。謫高郵州判。旋令城武。伯簡兄弟皆迎太宜人。鄉里榮之。而二君爭致珍味美服奉太宜人。太宜人則念張公貧時傷動。教二君慎官守。爲國盡忠。以體爾父之志。卽菽水之養。吾甚樂之矣。伯簡亦爲貴人所爽。罷鞏昌。太宜人不慍也。曰。仕至二千石不賤矣。而吾又年老。爾弟遊宦於外。爾歸固善。頃之。叔廣擢膠州。讎者未已。再謫湖廣布政司照磨。會長垣李中丞征反播酋。辟叔廣入蜀畫幕中。叔廣以勞瘁嘔血。卒於蜀。太宜人慟屢絕。曰。兒念我老難於行。而我固趣之。竟使兒客死。我則諄矣。伯簡強寬譬太宜人。居無何而屈孟昌卒。又無何而伯簡亦以痛心故。病卒。太宜人不勝痛。一病竟不起。太宜人生於嘉靖元年七月十二日。卒於萬曆三十年八月四日。壽八十有一矣。獨其歿以痛心故可哀也。蓋余聞之長老。張公天性剛。然其存心甚厚。與朋友交。情好隆篤。終身無間。每語伯簡兄弟。某吾執友。爾曹事之。宜如我也。嗟嗟。古君子哉。滑太宜人父滑翁。

柏鄉人也。而居大石橋。識張公於髫齒而女之。竟亢張氏之宗。豈偶也哉。張公舉於鄉。而滑翁歿。無子。張公竭貲以葬。盡哀而哭之。滑氏墳在柏鄉。張公爲葬之橋西北里許。以便張氏子孫世世享祀之也。張公子二。長居敬。卽伯簡。娶杜氏。封宜人。次居仁。卽叔廣。娶馮氏。封孺人。女四。長適廩生李采。次適舉人屈其興。所謂屈孟昌者也。次適郭楨。次適高邑廩生郭霖。孫男三。長駒。庠生。卽千里。娶柏鄉故按察司副使趙公惟卿女。繼娶新安項氏。次駿。聘柏鄉中書舍人魏公大用女。皆叔廣出。次嗣。聘柏鄉廩生呂應熊女。伯簡出。孫女六。長適蔡萱。次適太學生薛溥。俱甯晉人。次適元氏諸生李念孝。次適晉州施於政。次許聘序班焦紹子。次許聘元氏舉人翟洛子。伯簡叔廣所出各三。曾孫男一。瑞明。聘柏鄉舉人魏純粹女。駒出。銘曰。

古之勞人。於維張公。孤露困窮。以克奮興。志之未畢。厥算以終。淑媛成之。家用丕昌。如恢良夏。露雨瀼瀼。時往歲陰。且雪且霜。蘭摧菊秀。夫亦何傷。有孫曰駒。明瑤美璧。卜茲襲吉。維終古宅。光靈啓佑。後福罔斁。明故安定縣知縣敬菴王公墓誌銘

萬厯二十一年。歲在蛇。某月某日。甯晉王公卒。其子吏部君友人。高邑趙子往弔之。吏部君哀毀甚。趙子爲言禮戒不勝喪。聖人事死如事生。哀也者。死之也已矣。死而生之。之謂大孝。吏部君唯唯然。痛哭不休。留趙子食。趙子不能食。鯁涕而出。歸則吏部君以王大行經邦所爲狀來屬銘。蓋大行王公之門人也。趙

子曰。嗟。余何忍銘王公。余何忍不銘王公。王公名克慎。字某。別號敬菴。世居邑之北之石柱里。高祖昇。昇季子。鑒。是爲曾祖。天順中。少司馬公詔。其兄也。鑒生亨。壽官。亨生獎。公方直諒。鄉黨稱之。亦爲壽官。生公。公性資警徹。儼儼有大度。平生恥阿徇人。家恆不給。而樂施予。鄉鄰不能婚者。婚之。不足者助之。喪亦然。賴公婚喪者。凡百餘人。少讀書。一再過輒不妄。然不肯苦學。以爲甯越之不臥。蘇秦之刺股。徒欲速得富厚耳。故雖冬夜亦不篝燈。其爲文。獨挺高調。脫去學士蹊徑。每就學使者試。輒首諸生。然數奇。大比竟不利。隆慶己巳。是爲穆皇帝御極之。又明年。有詔郡邑。餽廩士。都試於學使者。拔其儁。一人入太學。苟文弗稱。度之不必備。命曰恩貢。公在選中。謁選。授北方安定縣令。縣二十里。故事。坊郭一里。免其雜徭。以供令之私用。所費不貲。財產坐蹙。公下車。首罷之。曰。仕有常祿。而橐之。又漁蘇小民。是跼蹐之行也。而余不忍爲也。市故有稅。後遂枷芟箕帚皆有稅。公悉除其瑣細。如額而止。邑有大鹽商。桀黠甚。前令莫敢誰何。公故知其名。而商怙於惡。以盜引事誣平民。公重敲扑之。商潛遁去。張觀察者。邑之巨族也。多倚勢爲不法者。公懲其一二魁宿。人人慄息。公爲安定年餘。邑甚清。然不能阿事司府。竟構諸直指。劾罷之。邑人號泣歎恨。如失慈母。觀察將往見公。竊語人曰。王公方失意。必不得見。至則公卽出見之。談笑如常時。觀察出。爽然自失。曰。王公高人。王公高人。其必有後乎。公歸里。以祿逮父母爲幸。敬養周至。覺兩尊人意常在親戚之貧者。請散俸金濟之。兩尊人心甚歡。及相繼逝。皆致哀葬。祭如禮。喪畢。乃與諸故人約。分日置酒。清

談晏笑。落日沈月。或自爲歌曲。被之管絃。曼歌屢舞。陶陶焉。洩洩焉。其樂靡有極也。吏部君早歲成進士。爲翰林。公顧不喜。曰。吾家無厚積。卒顯。恐不祥。及吏部君爲御史。輒貽書曰。而若不能明目張膽。寂寂效寒蟬。又不思蚤避言路者。禍不及身。必及先人。以故吏部君諤諤於言。不避權貴。人皆危之。公顧喜甚。與諸故人徵歌命酒。自若。然病目。久之失明。會吏部君以言左遷。二年徵爲春曹郎。歸省公。尋改吏部。吏部君之歸也。故欲上病自免。公日趣之曰。而受國恩太厚。不宜無以報而行矣。吏部君不得已往。甫一月。竟移病歸。歸十二日而公卒。公生於某年某月某日。壽六十歲。配周氏。以吏部君貴。封孺人。子四。之棟。卽吏部君。娶高氏。封孺人。之材。娶楊氏。之楫。武生。娶賈氏。之梅。娶秘氏。女四。長適錦衣冠。帶官寇。其知天。次適閻應選。次適孫可大。次適高不驕。孫八。元佐娶李氏。元化。元伋。元儼。元傑。元僎。俱吏部君出。元仲。之材出。元伯。之梅出。孫女八。五吏部君出。二之材出。一之梅出。曾孫女二。元佐出。銘曰。

公也忠。厥子隆焉。公也孝。厥子劭焉。天地不毀。忠孝是倚。浚水之涯。皋如嶼如。行者躊躇。嗟王公之居。

明故敕封文林郎朝邑縣知縣郭公暨配申孺人合葬墓誌銘

郭公者諱某。字敍夫。別號敬齋。郭侍御之父。申其母也。以侍御令朝邑時績最。封公如其官。申贈孺人云。郭之先不知何許人。勝國時有名仲德者。避紅軍亂。走高邑四家莊家焉。三傳至壽官禮。禮生宣。生經。皆有實行。經生淳。字某。別號鄙陽。嘉靖壬午舉於鄉。爲新安輝縣令。言行不苟。面目冷嚴。每賓昏讌集。喤喤

謹譁聞鄆陽公至。卽人人斂容。其所縣縣清。然不能隨時阿貴。故止於縣邑。士人至今稱方格者。必曰鄆陽公。鄆陽公娶趙生二子。公其仲也。性剛方。蹈履中繩。一一如鄆陽公。而稍飲人以和。少時誦書。鄆陽公以爲鈍。然喜其不弄愛之。從鄆陽公治詩。卒業時。邑中絕無治春秋者。奮曰。春秋何遂難至此。彼起家者何人哉。邑之所缺。固當自我先之。遂負笈入京師。師事柏鄉魏公謙吉。遼州李公維藩。受春秋。數年盡其學。晝夜精研。多所自得。爲文切理。不剿襲。數試不得舉。竟以歲貢授鄆陵簿。學者共惜之。公佐鄆陵。一以直道誠心。曾攝縣。審徭賦。及上官檄丈田。洧川尉氏皆稱均平。三年。輕晉府工正。亦以不能隨時阿貴之故。公至性孝友。處家處族。主於忍讓。有他人所不能爲。口所不能道者。侍御君能學。公復授之春秋。曰。吾平生竭心力於此。天必不終負汝。勉哉。侍御君竟用春秋成進士。試宰朝邑。入爲侍御。皆有名。公天性儉約。纖蔑出入必計。或以爲過。及爲封君。擲詘如故人。更服之。每對子孫。輒稱引祖宗貧時勤儉勞瘁狀。有奢麗者。峻責之。園在城外里餘。每步往。日三四返。或勸之車。不從。謂數行和於身。侍御甫拜官。卽多直言。人皆危之。意公不喜。公聞之。顧喜曰。言官宜如是。旣而侍御移疾歸。侍三年。公趣之去。無何侍御以言左遷。懷仁尉久之。再入爲刑曹。旋削籍。公聞之不色。慍是時余已削籍數月矣。侍御歸。兩家父子數接杯酒。甚暢。公平生無疾。七十後預爲棺。歲漆之。曰。死人之所不免也。當吾三十時。豈意有子。卽有子。豈意壽至今日。得爲封君。吾非不知足者。第無病苦。卽含笑去矣。公卒時果無病。如其言。蓋萬厯丁酉正月四日也。

遺令吾近體衣未嘗去布。送終亦然。因自趣成之。公修貌美髯。抱質而懷文。薄言而厚行。鄱陽公疾時。有感。囑戒貪淫。公佩之至老。爲二詩示子孫。皆實際語也。申孺人者。處士達之女。有姊適人不得意。父因誓不育女。最後生孺人。欲棄之。母王泣不肯。又欲死之。賴一嫗免。長而明慧勤潔。精女紅。及歸公。大母呂嚴而好潔。意少有能當者。孺人每進飲食。輒大喜。妬者因以口語中之。孺人終不置辨。生二女一子。俱殤。感憤悲號。遂病。病輒累月日不起。乃勸公娶李孺人。雖娶李孺人而劬心家務。旋旋砻砻如曩時。李孺人生侍御等三人。孺人每自養之。愛與李孺人等。內戚有私乞者。恚曰。謂我無子耶。今有子矣。勿復言。疾革。復有言者。孺人猶叱之。先是孺人夢坐彩輿。侍御負之行。乃呼侍御。歎曰。吾殆不得生享汝養乎。病竟不起。蓋孺人以丁卯十月二十七日卒。至萬曆癸未。侍御始貴。侍御少時。不知其非申孺人出也。其卒也。悲不勝曰。嗟。天乎。奪吾母而付之庶母之手。吾其能活乎。公憐之。他日負劍詔之。則益悲不勝。以申孺人愛之不啻出也。嗟乎賢哉。婦道非成子姓之難。而深維嗣續。無子而有子之難。申孺人親行之。可不謂之賢乎。是亦可以觀郭公焉。銘曰。

展也先民。秉心如結。動繇規矩。俗尙妄苟。獨以禮義。率迪祖父。練情薄遊。尊遂自遠。云誰敢侮。正氣鬱積。爰興寶臣。甄在東序。觸邪斷國。允忠允哲。聲動天下。有申作配。先卽於泉。莫食其祜。嗟茲碩人。飲汗茹血。備極勤苦。有子強折。克圖繼嗣。果昌厥後。龍章休讚。輝照幽房。母氏栩栩。生則孔哀。歿乃榮華。天道終有。

丁酉之歲。四月朔日。公來共安。士爲佞邪。女德絕宗。厥鬼愧沮。貞珉之辭。美符惇史。後天地古。

明故敕封文林郎滎陽令柏庵張公墓誌銘

張公名某。字以清。別號柏庵。其先太原榆次人也。有名遜者。始徙柏鄉。遜業儒。爲諸生高等。早卒。遜生文。中文中生揆。是稱二老公。揆生璨。即公父也。又業儒不成。以貲爲京口驛丞。娶趙生子三。長曰公安。簿幹。季曰省。祭乾。公其仲也。張氏三世業儒。至公而成。爲滎陽令。以子駕部君長治績最。封文林郎。云。公順幹。長鬚豐盈。軒豁九歲。遭大母石之喪。哀戚如成人。二老公異之。初從贈中丞澄齋魏公學。魏公謂驛丞公曰。此子卓犖。必致遠大。無疑也。公性不好嬉。學甚精力。每讀一書。必挾其奧要。手自比輯。未爲諸生時。名隱隱起。既而以驛丞公之命。與兄弟異居。晝緣田畝。夜篝燈吟誦。不閒寒暑。故其學殖兼茂。試每先諸生。而資用亦漸溫。初二老公老。有幼子瑁。憐之。疾力執公手曰。以瑁也累汝。公應聲曰。不敢忘。如是者再四。而後瞑。公竟保持瑁。以至成立。執父母之喪。毀幾不勝。其爲棺槨。豫求美材。不難窮絕幽險。走趙晉燕薊間。惟恐費之不多。其處兄弟間。嘗翫轍曲從。期于致美。公安公謁選。爲人給取金四百。云爲公長子所誤。公卽償之。弗辯也。省祭公子有筦庫錮虧者。稱責代入。不以傳別視也。公當貢。值省祭公病甚。不忍去。爲垂囊治棺。斂具極備。省祭公感公不絕口。欲以田園如干抵所費。公佯諾。終弗取。姻族子弟。學者數之。商者貲之。急者振之。吉凶不能舉者助之。幼而瞽者師以術之。咸使得所。邑故郝能妻霍。孝節貞粹。以貧故。

弗彰。公爲言之有司。表其宅。諸生魏大本。離大辟。非其罪。又連及平民石文趙治輩。公倡通學。力爲昭雪。咸得脫。其蒿目人之困類如此。每歲祁寒。施錢丐者。或與之薪木。令聚烘取煖。以不至僵凍。有河南戍卒自北來。患疫甚殆。公藥之起。給道里費以歸。比再調至。獻香芋焉。曰。非遇公者。吾其塗之朽齒矣。公有補世益民之志。而屢試棘闈不見收。御史龐公尙鵬來視學。公條上八事。其一言入貲授官之例宜罷。其二言徭役多不平。宜詳釐其弊。其三言鹽斤之稅宜除。其四言軍衛之卒困苦已極。宜禁將領之貪殘。其五言種馬之遺害。宜變通宜民。其六言驛傳偏累。宜令僻邑佐之。其七言修濬城池以防不虞。其八言禁剗寺觀以漸絕異端。旣而御史大夫宋公纁至。亦條上之。皆稱善相屬。曰。經濟才也。公竟以貢入太學。邑貢者。例有裝駕貲百餘金。斂之於民。公力辭。邑令高公曰。君自爲則得矣。其如後進何。公曰。吾誠過。則取其籍。署曰完。其廉而不苛如此。公卒業太學歸。慨宗法之廢。而風俗不惇。乃訪求先世之故爲譜。歲時倡族人合祭於塋。祭畢共饗。講敦睦之誼。公出仕爲滎陽令。一意崇寬大。撫掩其民。不操切獵名。下車問邑何以多流冗。則田在草間。而稅多積逋之故。捐金爲買牛七十餘頭。給不能耕者。令止納今年之租。復業至數百家。而稅之逋。往往繇黠役歷代辦。多冒沒自肥。公下令。皆躬自納。竣事。給印牒。宿弊頓清。公好古教化。嫠婦守節者。輒旌之。且問以布粟。有爲其祖母廬墓而沒者。爲題石表揚之。其亂倫敗俗者。悉寘於法。卽豪有力。弗可奪。滎之東南爲周藩寢園。守者多踏小民。公正已執法。虐餼稍減。乘傳入境者。多分外求。

索公力裁之。大都公爲政寬於良民而嚴於豪猾。惴惴守官。恥以竿牘苞苴結尊顯。皆不合宦機。故不悅者求其瑕無所得。則曰選輓。竟以此退。公之歸也。則駕部君成進士矣。漣衣糲食。不異寒素。性能酒。日與親知飲。雅歌投瓊甚歡。每耕刈時。引一蒼頭騎馬之田間。逢田更野叟。溫然笑語。人人親奉。故好服食導引之事。時接見方士。片言之合。卽解衣履畀之。以哭中子過哀。病痿數年。竟不起。公之內行淳備。宗族鄉黨皆能道之。其爲邑人計也。余方爲司農郎。有僕道公門。隸之言曰。睹金錢不取。欲再往可得乎。其言甚鄙。然足知公之在滎陽矣。銘曰。

吁嗟張公。質有其內。恪慎克孝。友於兄弟。昂昂將將。孔德之厚。如山之雄。而仁是右。永終令譽。自於盧首。百里爲宰。悴民鳩之。彼之所懷。人或侮之。彼之所祝。鬼神麻之。爰卽初居。昭受吉祥。祿謀則拙。道謀則臧。組修匪息。委於咸唐。後受其福。奕世彌昌。

明敕封文林郎永城縣知縣魏公暨配馮趙兩孺人合葬墓誌銘

魏公名大成。字時夫。別號樂吾。世縣柏鄉。不有積德。至澄齋公而顯。澄齋公名巖。公之祖也。生二子。名謙光者。別號慎齋。公之父也。慎齋公之弟名謙吉。別號槐川。澄齋公高才宿學。二公皆少而奇挺。父子爲諸生。並稱名士。督學胡姓者。以面貌沙汰諸生。澄齋公在其中。而二公者每試迭爲第一。然槐川公早升第。爲中丞。貴澄齋公而慎齋公竟以太學令衡山。朞月而歸。衡山公娶張孺人。晚乃舉公。顯昂映麗。望之知

其福人偉器也。十五補諸生。名駸駸起。視一第反掌耳。而魏公者。馮公之壻也。馮公者。世所稱無懷山人。爲酒史傳於世者也。馮公博學能詩文。三十餘而應歲貢。衡山公欲公與馮公友。天下士於太學。乃入貲爲太學生。馮公面目言動。非常人也。每同遊。義冠衮服。見者洒然異之。冰清玉潤。焜耀一時。同試於大比者數矣。而竟不第。自太學歸。坎壈不自聊。進取之志頽矣。邑有褚公者。馮公其壻也。褚公故博學。能詩文。能豪飲。此時柏鄉多酒人。無先之者。自蘭陽令歸。三公者遂爲文酒之會。雅達風流。後進咸慕效之。久之。馮公先褚卒。財四十一。而魏公所娶馮孺人卒久矣。魏公愈益蕭騷岑寂。惟靜坐。攤卷吟哦。賓婚希見其面。及仲子乾仲舉於鄉。遂杜門不復出。乾仲成進士。爲永城令。以考最受封。具衣冠一。望闕而拜。卽幅巾豎褐。衣袖俱短。敝則補之。以示不出之意。邑令長至親往賀。皆不見也。乾仲被徵。選爲侍御。待命不下。遂告終。養歸。無何亦先卒。乾仲之子元昌。復爲名士。將期將翔。公不少延也。公事父母以孝著。庶母弟大順。家業中落。公飲食教誨之。今爲廩生。常著二論。其一言養生。以習靜爲主。無取於呼吸吐納。偃仰詘伸之術。尤戒任時醫。曰是多庸妄。奈何以性命付之。其一言佛氏之徒。率以禍福冥報。怵誘愚人。儒術明則異端息。繇前之云。可通於用人治世。繇後之云。卽孟子所謂君子反經而已矣。皆至論也。公先娶馮公之女。聰慧而孝敬。繼娶唐山庠生趙公垣之女。幽貞而勤肅。皆嗇於年。然皆以乾仲貴。亦豐於艾矣。趙子曰。余與魏公。皆馮公之壻也。內子乃後母所出。甫于歸。而馮公見背。余未仕時。每過魏公。輒歡飲。不啻十日。及

余解官抵里。無何公已謝客。余過則見之。公自稱老病。恆扶杖行。一日余偶至。公遽舍其杖而趨。相與大笑。飲極醉而罷。余每歎其人似袁夏甫。袁夏甫者。汝南人也。當東漢之季。築室於庭中。閉門不見客。范孟博以爲至賢。余欲效之而不能也。公嘗署其門曰。一錢不擾鄉里。片紙不入公門。嗟乎。世之士大夫。皆若此。則風俗美而小民安矣。公生於嘉靖云云。生子二。長純嘏。娶張氏。邑同知書紳女。蚤卒。張獨處一室。焚香誦經。其淨食以供佛者。猶之魏公也。人皆孝之。完節而終。次卽侍御。名純粹。娶張氏。贈孺人。邑兵部職方司郎中主敬女。繼程氏。封孺人。唐山生員體乾女。孫六。柏祥卽元昌。選貢生云云。銘曰。

有翼者飛。有趾者趨。彼蝸之緣。而竭其濡。橫目之民。孰能安居。倜傕魏公。龍種鳳雛。風骨文采。自與凡殊。表立雲霄。俯瞰中區。時之不利。乃遁人徒。豈無梁肉。含英以瑜。豈無文綉。裁薛而姝。厭世垢氛。乘化而徂。俗鬼實多。孰可與俱。

明鴻臚寺序班焦公暨配王李二孺人合葬墓誌銘

余隆慶壬申遊太學。與鴻臚焦公。兩淮鹽運郭公。鞏昌太守張公俱。三公者。故與余鄉曲姻連。郭公張公皆三十許。焦公與余皆二十許。情興正佳。朝夕遊處。謔觴談劇甚歡也。事已而竣。往來加善。及宦成歸里。年皆尙壯。遂結高陽之社。久之郭公卒。其子公肅。屬余爲銘其墓。張公卒時。余方病。其子嗣不知旣殯之後。可以銘入也。而未余屬。焦公卒。其子元開。以趙殿之所爲狀。屬余爲之銘。焦公名紹。字子業。號慎菴。趙

州人也。始祖良臣。生士敬。士敬生林。林生得才。得才生茂。茂生景。景生秉彝。是維公父。娶秦生公。焦氏世以勤儉致饒裕。宗族數百人。其所居鄉曰封斯。入其境。林木茂密。舍宇修整。望之而知其舊家也。公幼而慧。勤學。然無弟兄。氣體又弱。父憐之。令輸粟入太學卒業。曰。今仕塗拘於資格。異日不過爲郡邑小吏。屈膝貴人。余弗能也。竟謁選。授鴻臚寺序班。遇覃恩。移贈父如其官。母孺人曰。吾之願畢矣。遂稱病歸。先是秦孺人蚤卒。非久。父亦就世。公事繼母朱孺人。孝敬篤至。如事父母。有幼妹。朱孺人出也。嫁裝獨勝於諸妹。母偶病。過其女家。有醫稱神鍼者。鍼其股筋。斷。竟不起。公以爲終天之恨。哀毀幾不勝喪。有兩叔。後皆貧。公時時周給之。皆不下數百金。且割地以振業之。公見其族益大。讀書者多。乃創爲精舍。規模廣秀。家族中子弟爲文會。今青衿甚衆。學使者都試。往往取高等。而其人皆馴雅謹飭。焦公之所染也。公每蚤起家。僮灑掃。自堂室以及大門之外。不容一塵一芥。几榻杯盂。概滌可鑑。數十年如新。客至。酒醴羹臠醢醢。無不致精。人言焦公好潔。其實非也。蓋繇生而小心。視天下事無可忽易者。至於稼穡之務。尤所洞徹。其佃作者。教之已成。非惟竭四肢之敏。種植蘆蓂。皆有妙理。故其禾稼美而收入多。以其有餘。恤糴蘇困。予之不望其報。貸之不責其債。是以焦公之孝悌。稱於宗族。簡操重於士林。而歡聲滿於道路。余嘗與之書曰。作人如公。卽從此至八百歲。定無過失。非諛言也。趙殿之乃其壻。通雅之士。公愛之。自己未冬病痢。踰年不瘳。每招殿之與語。曰。吾殆不起乎。人生貴知足耳。余以布衣。筮朝班之末。其職易盡。從賢士大夫遊。

不余彼也。先世所遺薄產。不減尺寸。有子幸爲諸生。自少至老。無傷害於人。無獲罪於天。且年過七十。安所不足乎。越數日卒。斯又可謂達人大觀者矣。元配王孺人。高邑廩生納言女。端嫺寡笑言。精婦工。能勞苦。善事尊嫜。克成焦公之孝。焦公生於云云。男子一之啓卽元開。銘曰。

吁嗟焦公。何慎如之。歛不欲廣。舉趾恆卑。車奔火滅。不易其儀。少而不童。老而不衰。成回之恭。斯人庶幾。以此衛生。壽甯有期。司命無權。數定不移。平棘之西。古樹風悲。吁嗟焦公。永寐於茲。過者遠望。佇立淒其。

明解元馮仲昌暨配張孺人合葬墓誌銘

仲昌以萬厯辛巳二月十八日卒。二十五年矣。壬辰之二月二十五日。葬於施莊祖塋之東。未有銘也。乙巳十一月十日。配張孺人卒。歲在龍蛇。賢人嗟蛇。女子之祥。節婦以亡。古無虛諺哉。其子思朴。將以十二月之二十六日。啓仲昌之窆。而合葬焉。孺人之弟張職。方懋倩以狀來。屬余銘。仲昌之先世。縣柏鄉。居城南之村。曰寨裏。有三老公者。徙城東之施莊。三老公生進。進生剛。剛生昇。昇生敬。以廩生援例爲唐府典寶。敬生達。達生鍾。舉於鄉。爲濮州守。居家孝友。當官著名迹。生時化。是仲昌之父。鄉人士所稱與川公者也。與川公高才多學。能詩及古文詞。意氣德行甚高。然數奇。四十貢入太學。未幾而卒。遠邇惜之。仲昌名嘉遇。生而哲面。大目闊口。聲音鴻朗。殆非常人也。時未有識者。一日爲文示余。余賞其數語曰。是必以文鳴。仲昌遂肆力於學。所爲文無不余求定者。余多所刺譏。仲昌無不怡懌。與稱賞之不殊。每與余杯酒論。

文無不爲之絕倒者。厥後余游長安。遇孫文融。文融謂余文似史記。余乃取史記精讀之。則貽書仲昌讀史記。仲昌之文。則有史記之致焉。凡余之所聞文融論文語。每舉以告仲昌。仲昌嘗欲走長安。從文融學易而未果也。乙亥。余爲汝南司理。明年丙子。仲昌未得與秋試。而是年舉第一者。爲南樂魏懋權。仲昌書於壁曰。今年魏懋權冠秋榜。吾無慮矣。蓋懋權屢舉不售。竟冠秋榜。迨己卯。仲昌遂舉第一。長安諸公見其文。曰是有識見。不類下邑士子。好事者遂云浙江人而居於趙者也。文融以余所親告之。是嘗欲從我學易而未果。故名士庚辰春。仲昌不第。明年遂卒。其時余尙在汝南也。仲昌爲諸生時。督學賀公一桂極稱其文。以爲異等。中丞耿公定力過汝南。謂余曰。頃見賀督學云。柏鄉有馮生者。文殊似趙夢白。余具言乃其所親。相與大笑。此時柏鄉令張公左海。博雅之士。而邢子愿爲南宮令。皆國士。仲昌郡中二千石聞仲昌名。招致門下。絕愛之。遂有以重賄求仲昌爲請寄者。計二千石無不從。仲昌皆笑而卻之。其好修又如此。仲昌立志甚銳。欲爲冠秋榜。卽無先者。他事何不可成。其如年壽之弗永。何哉。張孺人者。滎陽令張公之女也。仲昌誠好學。孺人諫勸之亦甚苦。仲昌豪於酒。因孺人而覆杯。仲昌之卒也。孺人哭欲絕。然視之有二男子二女子。以此強活。乃長女許聘諸生魏三益。殤次女適諸生魏文燧。未久而死。次子思若。六歲而登高墮地。一股枯不能行。縣縣連連者十三年死。惟有子思朴在。對之日流涕。及其能讀書。稍惰卽笯之。威加於折筭。博求名師。不惜供給之費。思朴爲諸生。督之愈嚴。先是孺人以舊宅之不安。人卜宅於

西門之內。高樓突厦。炯炯如也。沈沈如也。皆孺人所自經營。孺人故多病。其幸遺孤之成立。而望其繼父之志。慮資用之不贍。腸迴腹轉。宵晝靡甯。劬勞不可名狀。恆內熱面赤。時或銑寒。內子其女叔也。謂曰。嫂有婦矣。何不稍自愛。曰。余天性如是。固知其極苦也。病既力。則歷歷言身後事。葬欲蚤欲薄。及他纖悉曲折。無所不至。然總之爲思朴慮。蓋孺人之所愛。不在性命。鞠躬盡瘁。死而後已。匪獨貞臣也。節婦亦若此矣。孺人將歿。直指使者以貞節表其宅。孺人猶及見之。歿亦何恨哉。仲昌生於嘉靖癸丑三月十三日。得年二十九歲。孺人生於癸丑三月三日。得年五十三歲。思朴娶封崑令呂公新芳女。有一男子。聘魏三益女。卽仲昌長女所許聘者。二女子大者許聘諸生魏邦甯男。銘曰。

美人之骨。脩其陳矣。魂氣何之。其爲神耶。英英矯矯。豈遂泯耶。哀哉淑媛。春華待零。孤兒有孫。乃歸玄庭。□□覲耶。而余是銘。

明潁川許公墓誌銘

許公名郊。字叔郢。別號潁川。忠節公之孫也。忠節公娶楊夫人。生光祿公珣。珣娶王孺人。生公。忠節公世爲固始人。其令樂陵。以剿劉賊功。擢山東備兵僉事。時臨潁王公金爲憲副。好忠節公豪賢。遂以女妻光祿公。生許公。故許公號潁川。許公生而頎幹豐骨。齟齬翹秀。楊太夫人有十數孫。獨愛公。錦衣公瑒。光祿公之長兄也。迎養京邸。攜公往。及太夫人卒。隨靈輜歸。時數歲耳。哀情禮貌。有若成人。弱冠補弟子員。博

涉典雅。文詞藻瞻。邑廣文姜公丹陽人。亟稱之曰。固始誠多才。然無先叔郢者。督學楊公試士汝南。以公爲第一。楊公者。蒲州楊太保之子。太保聞之大喜曰。此天所以報忠節公也。是惟隆慶庚午。許公果舉於鄉。然數困於春試。愈益發憤。於城東數里外。蒔花移竹。結茅爲宇。署以超然亭。讀書其中。公慷慨倜儻。其天性少。而習聞忠節公之事。補其未備。而手編之。曰抱恨錄。正襟覽誦。涕泗太息。恆欲得志於時。以報國家。而顯揚前美。其學甚勤。不臥不休。時以失職氣不平。則尋溪把釣。或命匹侶。醉酒自遣。終不爲任達。衣服飲食甚淡素。見子姪有尙奢麗者。則戒之曰。世家固多如此。然吾祖以捐軀盡忠。國家厚報之。豈他世家比。子孫何忍縱意乎。言出惻怛。多所感悟。其立身範俗。主於崇尙名節。維持風化。於宗族尤拳切焉。居恆約束僮僕。不得侮鄉黨。犯者涕泣而笞之。鄉黨有不平。輒爲叩自是非。俾歸於好。許公竟不得志。以壬午六月十九日卒。距其生嘉靖壬寅四月三日。年四十一矣。娶鄭。邑中丞鄭公重之孫女也。卒。再娶趙。東正陽人也。生一女子。適諸生鍾大成。亦卒。兩孺之皆賢。許公爲諸生時。內助賴之。再娶杭。辛巳生。念敬。九閱月而許公卒。疾力屬杭曰。以兒累汝。善育之以繼宗祀。勿黠家世也。念敬起諸生。旣而入貲爲鴻臚。長安士大夫賢者。皆與之游。稱許。聿懋云。聿懋其字也。聿懋質朴簡澹。而內剛介。恆憤世疾俗。見賢者。若渴之遇雨。睹時貴儉邪。錮賢亂政。抗疏直言。時論壯之。無何稱病歸。忠節公塋在邑南十里寶家岡。許公葬邑北十里馮家岡。聿懋卜以今年壬子之十月二十五日。遷許公於忠節公之左。且築室其傍以居。而屬

余爲誌銘焉。余嘗爲汝南司理。丁丑行固始。謁忠節公祠。作詩弔之。得見許公。相與大醉而別。時聿懋未生也。辛丑。余廢居鄆上。聿懋始來。年二十。余想像許公之眉宇。恍若見之。自是數往來。聿懋之疏上。同志者皆曰。忠節公之孫宜爾。而不知其父許公。固怵怵忠直人也。天不使一第。鬱伊結縉以歿。惜哉。許公蓋預知卒期。先是王孺人病亟。公籲天願以身代。夢中若天告之者。子齡三十耳。以孝益之十焉。與昆弟析居。悉以美田宅讓之。而收先世遺書曰。吾得此足矣。其兢兢大節如此。聿懋母杭。燕人也。讀書解大義。授聿懋書。每食。則先上之。王太孺人。次上許公几筵。而後食。忽一日。抱聿懋而泣曰。我將舍汝。從而父地下矣。以聿懋屬其庶母張。長號而逝。丁丑五月六日也。距其生嘉靖癸亥六月十八日。得年二十有五。時聿懋七歲耳。張竟撫之。以至成立。古云視死如歸。杭也以之。死者復生。生者不愧。張也以之。此與古列女何殊。忠節之家。許公之儷。宜其若是懿矣。聿懋娶周生子曰昭崇。聘喻舉人廷璽女。昭象幼。銘曰。

明孝廉曹仲子墓誌銘

曹仲子名時舉。字直甫。別號愛山。少司空嗣山公之弟也。系出蒼姬。代有懿德。其在獲鹿者。以少司空顯。祖父皆贈中丞。仲子秉北方之正氣。陶父兄之家學。式高懷遠。有隰朋之志。意所不樂。卽竊秦之富。命晉

之榮。視之蔑如也。片言合契。析心吐膽。定金石於班荆之頃。仲子豐幹皙顏。談笑芬芳。飲酒多而不亂。所至四座盡驚。見者決其名士。交與極一時之秀。其於書目之所涉。無所遺忘。心之所思。造極突奧。父見背之後。頗任俠不學。大父及母太夫人在堂憂之。皆悲淚苦言勸諭。仲子幡然悔悟。厲甯越不休之志。歲己卯舉於鄉。先是郡二千石都試三十三城之士。拔其尤者數人。館穀而課試之。仲子與柏人馮仲昌。張琳倩。尤爲俊選。放榜之期。二千石中夜待吉語。仲昌舉第一。琳倩四。直甫十四。二千石喜甚。爲盡斗酒。禮之極隆厚。仲子自是志益銳。學益精力。然屢上春官不第。至乙未。期望益殷。又不第。殊鬱伊無俚。曰。吾其遂如是已乎。夏秋之間。一疾數日。奄忽隕靈。遠邇悼心。皆曰。曹氏世有陰德。仲子之高才溫仁。謂宜兄弟並起。雲翔龍變。而坎壈於時。又不壽。天乎何可知也。仲子之父亦終於孝廉。然其後有少司空。爲時寶臣。國恩資幽壤。仲子娶韓。竟無後。天乎何可知也。馮仲昌蓋先直甫死。是殆有定數焉。仲子卒於某年某月某日。距其生某年某月某日。年若干歲。卒之日。少司空謂余曰。家弟墓銘。願得子之言不朽。余許諾。少司空游宦未歸。至是十四年矣。太夫人就世。卜以今年己酉四月之某日。殯於虎山之陽。仲子隨之。俾來徵銘。銘曰。

恆山雄精。溢焉踣兮。其文龍鱗。靜幽墨兮。時非隆古。天道惑兮。曄曄名木。摧折亟兮。騰躑思騁。踉蹌息兮。復之藐孤。在其側兮。黃鳥嚶鳴。行路靈兮。永依慈親。庶血食兮。

明張曰肩墓誌銘

張曰肩名熙德。似洲其別號也。曰肩之先世。繇信陽而來南宮。凡七世矣。父學古。字道夫。中丙辰進士。仕至戶部員外郎。行身正直。居官清。娶白宜人。文裕公之後也。生五男。子曰肩第五。幼卽奇秀。讀書甚易。遇事輒解。聞言皆曉。生七歲而戶部公見背。哀毀如成人。白宜人寬譬之。乃強飮粥。三年之間。不忘憂戚。釋服。濟南邢子愿來爲南宮令。試以文。亟稱之曰。燕趙間自古鮮文士。今何復有張生。蓋子愿於同榜中。認許趙子仕。後得柏人馮仲昌而才之。又得曰肩。使燕趙改色。曰肩旣少年。美文詞。學無不該。又眉目清朗。白皙綠鬢。能飲酒。舉止言笑甚都。遠邇皆以張五公子璧人也。是必爲公卿。萬厯辛巳。遭白宜人之喪。僅不滅性。益發憤趁學。乙酉遂舉於鄉。故事舉於鄉者。人予百金。曰肩奉其四兄各十餘。以給親戚之貧乏者。戶部公遺產業故薄。曰肩囊空。得百金復散之。慷慨好施。其天性也。伯父老無子。唱議三兄敏德爲後。其所有田宅。悉以與諸兄弟。不取尺寸。長兄先逝。爲營送終之具。殫竭心力。三子二女。婚嫁之事。無異己出。曰肩屢舉進士不售。然文章意氣。重於士林。祭酒先達。引與編席而談。他舉於鄉者。莫敢望也。南宮大縣令尹皆甲科之雋。當塗所信重。自子愿而後。如安陽崔公之世德。秀水范公之文雅。今太原馬公之高亮。無不造廬加禮焉。公之來也。曰肩已病。時時占護之甚備。以是其諸姪廷議廷諒等八人皆爲諸生。士論美之。辛丑春試。給諫侯公先春業已甄錄。而會易詩有司爭多寡。侯公不能拔。深歎惜之。曰肩自期冀

絕。俛首而就書生之技。欲以致身用世。而數困鄉里後輩。往往皆貴倨。是年幾售。又不果。則仰而嘆曰。天何其巧於抑我也。命可知矣。遂病。頃之有瘳。復病。不能言語。行動者五年。竟不起。其病時猶常讀書。爲詩文益博益工。其思不亂。其氣不衰。殊不似有病者。曰肩自謂必起。他人亦信之。然卒不起。其危篤之時。思猶不亂。氣猶不衰。其遺筆皆可傳也。異哉其常人乎。平生所負人之債。一一書之。以示其子蕙生。令鬻宅以償。蕙生再請曰。不可。盡一切與趙先生圖之。過五七往求銘蓋。曰肩自癸巳來從余游。久而愈相信。病中念趙先生所交與多海內賢豪。冀他日宦游盡結識之。而身已病。莫知起時。則以所著作上長垣李于田司馬。司馬盛稱之。以上李本甯太史。太史書至。而曰肩之瑟撤矣。痛哉。曰肩之文學材術。識見意氣。自負於天下不多讓人。而獨親趙子。取其椎魯。融而爲正直朴雅。曰肩所進益高。不可及。足有爲於天下。而一病不起。痛哉。曰肩生於嘉靖辛酉四月十五日。卒於萬曆丁未九月二十三日。年四十七歲。配周氏。冀州周知州濂女。男一。卽蕙生。府庠生。娶邑人孟好謙女。繼娶梁嘉瑞女。女一。適歲貢生朱繡裳子。府庠生遐胤。孫男一。彥孺。甫五歲。蕙生以戊申二月二十七日。卜葬曰肩於城東十里小李村北之新阡。來求銘。銘曰。

豪傑之厄。厥惟茲時。讒人困之。鬼伯天之。東陵壽考。華者窮奇。嗟我曰肩。終於孝廉。軒翥高翔。倏振自天。齋志永訖。茲乃其阡。

味槩齋文集卷十三

墓誌銘

明太學徵野張公偕配郝孺人合葬墓誌銘

先是余爲兩兒求師。平定延公墓竹爲河北兵使者。以使事過我。輒與之謀。則稱張君伯顯。文行卓犖。可師。余禮請之至。則果溫仁篤謹人也。徵獨文學之高。明年其尊人徵野公來。本溫仁篤謹人也。因是以問其前世皆積德。徵野公之高祖承宗爲僉事。甯夏士民徧思之。祠祀不絕。曾祖敘爲太學卒。祖元錫以太學爲山東藩司知事。父洲近泉公舉於鄉。爲灋縣令。娶黃生徵野公。童齒穎脫。能爲文。有孫司理者行部。聞公名。與青衿並試。青衿莫先也。大奇之。爲諸生。每試皆高等。然五試秋闈皆不利。竟以明經選入太學。公生有至性。遭母喪。癯思哭泣。三年如一日。時近泉公已逾七十。公承顏怡志。寂視默聽。朝夕膝下。不暇學問。及見背。致毀如母。遠邇皆孝之。待弟愛。訓子嚴。交友信。見人之窘急。咨嗟痛念。盡力振拔之。故其歿也。疎逖鬱悼。不異親友。公配郝孺人。給諫公夔之曾孫。太學公楨之女。父嘗奇之。不輕許人。睹張公之器宇有異。遂女焉。孺人于歸時。近泉公方游宦家溫。然孺人性勤儉。自奉薄。澣污執爨。奉兩大人。不敢辭煩。

辱兩大人甚歡。張公之愛譽，實得孺人之助。張公教子嚴，孺人則謂之曰：爾輩得無荼之乎？夫病蠲身強，而後知藥艾之良也。日月易徂，少年戲蕩，長無所成，悔不可追矣。孺人卒時，近泉公尙在病革，惟念舅景暉先朝露，不得終奉養，魂魄長恨無窮。張公名所志，字汝道，別號徵野，生於嘉靖戊申二月二十三日，卒於萬厯庚戌二月十七日，年六十有三。孺人生於嘉靖癸卯五月二十六日，卒於萬厯丙申五月初一日，年五十有二。張公繼配董孺人子四：景星，卽伯顯，廩生，娶李繼娶劉璧星，庠生，娶李繼娶趙德星，庠生，再娶皆王俱，郤出。台星，聘郭董出。孫五：卿雲，聘石景星出。際雲，梯雲，英雲，彤雲，俱璧星出。孫女二，未聘。景星出。伯顯卜以公卒之年秋某月某日，與郤孺人合葬於西郊之野，以延公所爲狀，求誌銘焉。余觀張公，無論其性行，卽體貌莊厚，亦不類不壽者，而僅逾耳順，何哉？張氏之積德守學四世矣，而未甚章，其在伯顯輩乎？余未見其他。伯顯之文質彬彬，固足以致身青雲之上矣。銘曰：

仁者宜壽，行年未老。柏舟永嘆，數焉不偶。書云孝乎，克孝克友。遇配毗之，克婦克母。以有孫子，考終於牖。種德休符，福在厥後。

明太學張公暨配種孺人合葬墓誌銘

張公諱汝梅，別號後沱，相傳其先山西洪洞人也。永樂間遷於深州清輝頭村，祖昭生子二，曰巍曰義。巍以鄉舉爲榆社令，封父如其官。義官張公之父也。公少而英敏，總角入庠，卽有聲。所讀書掩卷無不成。

誦屢試不售。因入貨游太學。其爲人薰然溫煦。而有以自守。儻居竟日。或不過數言。言則胸中都盡。即有所不平。不能含咽。或面折人之過。多不能堪。然旋即消釋。無所芥蒂。里中皆以張公終長者。平居自讀書課子之外。絕無雜好。兄汝桐早世。病危時。子大猷生三月。親執公之手。以存孤爲託。公恩勤教誨之如己子。大猷及子兆先。俱爲諸生高等。深州故多水患。隆慶己巳。淫霖爲虐。潯沱溢溢。深州之害尤甚。公所居村。去束鹿十里而近。捐貲築長隄。身親督率。杵杵如雲。邪許之聲。徹於晝夜。亡何束鹿城陷。而清輝獨完。歲大旱。出穀糴之。俄而騰貴。糴者益其價。公守之不二。曰。吾不以利傷信也。饑人多。不可勝賑。有抱攜婦子而逃者。公齋戒沐浴。日夜哭泣。禱於三官祠中。俄而得雨。衆皆曰。此張公雨也。貧病者。無親疏。使人往問之。酒肉藥餌。惟其所欲。賴以全活者甚衆。清輝叢爾之區。而青衿二十餘人。登科者二人。先是張公請閻生爲師。羣一鄉之子弟而教之。貧者爲之行束脩。甚則資其衣食。俾無廢業。以是文學駁盛焉。張公歿後。諸子皆未壯。歲比不登。政煩賦重。迄今三十餘年矣。而家產益豐。子孫衆多。皆翩翩有文采。則種儒人內助之功。儒人衣污澣而甘芋菽。恆五鼓起。命諸子讀書。諄諄然教之以門戶之難支。學之不可以怠。而躬自汲爨。一切執務。手迹整理。農月則徧歷畎畝。觀耕種銍刈之事。倉箱有餘。以周姻族鄰曲。聞乞兒哀號。則常食而歎。輒以壺飧飲之。廚無腐餘。孺人素無病。丙辰冬。病絲懣矣。忽張目言曰。青衣童子請我。我便去。其子孝廉君曰。遽三年而來也。孺人遂復起。孝廉君旋自悔恨。何乃僅言三年。然莫知其所

以言也。今年己未仲冬復病。曰向與童子期。今其時矣。不三日而逝。里中男女老幼。無不隕涕。一如張公卒時。張公生於嘉靖癸巳。享年五十歲。種孺人生於嘉靖壬辰。享年八十八歲。子四。女二。孫男四。女四。一鳳出者尙幼。孝廉卜以季冬之念四日。合葬於清輝南之祖塋。以誌銘屬余。余聞東閭子晚而儻然甚困。或問公何以至是。曰。吾嘗在位七年。而未嘗薦一人也。貲至三十萬。而未嘗富一人也。今之人進則招權納賄。退則漁食鄉里。此東閭子之所不爲也。而曾不若其自知。張公韋布之士。其家未足爲大富。以其勤儉之所致。利益及於鄉人。家無貧而歲無凶。人之賢不肖。相去豈不遠哉。種孺人因而行之。前後數十年。非夫易之所謂積善者耶。子孫之興。不亦宜乎。余久不爲文。孝廉從余學。知其至性。不忍辭也。聊據其所爲狀。而比次之。無溢詞焉。銘曰。

猗嗟張公。先民是則。儒人相之。共行其德。逝者若存。其德益力。吉祥來萃。恆有喜色。天數既終。茲焉止息。馮夷避之。賢達攸域。清輝不泯。嘉名永勒。

明太學生魏元伯墓誌銘

魏元伯名文燁。柏鄉人。少司馬魏公謙吉之孫。太學生太平之長子也。生而脗面廣額。眉宇瑰異。少卽能誦書。父愛之。以戴氏禮浩繁。北士罕習者。爲延師教之。輒通十五。爲諸生。其意恆不欲與俗同。爲文有奇氣。絕不與他諸生同。每試皆冠。其學無不涉獵。能爲詩及古文。能酒好客。四方之詞人游士至者。皆館聚。

之。張筵歌舞。日夜不勸。交友信能振人之急。自負甚高。於人罕所詘讓。以青雲可企足而致。即他人皆推服之。然數試於鄉。不利。戊戌。督學使者周公孔教奇其文。拔入太學。周公與余善。後知其出余門。愈愛之。折節忘分。然自是復不利。外爲陽陽。而意憫惻不自聊。則裹糧之長安中。僦居。距躍讀書。丙午秋。試出闈。即使蒼頭飛騎以文來視余。余答之曰。君文恐未必售。蓋元伯屢蹶。心思益亂。向來奇氣稍索矣。已而果又不售。聞母高病馳歸。月餘。母竟不起。迨己酉。則七困於旃棘矣。庚戌之春。乃見於余曰。弟子不知所爲何事。而遂四十。今始自知亦極愚耳。如唐子去父母而狂奔。自此願歸依吾師矣。功名分定。日受教於吾師。爲篤行博學之士。庶幾不虛此生。遂攜家鄙上。從余學。歲暮暫歸。曰。明年即不歸矣。蓋除月之十八日也。至二十二日而病。病日益力。辛亥二月九日而卒。蓋余欲元伯盡讀余家之書。余之所知悉以告之。余所交海內之名賢悉令見之。不謂元伯遂死也。余每過元伯。元伯僅有一幼子曰蘭哥。甫三歲。聞余至。即出見。並足深揖。問安穩否。元伯命之退。戀戀不肯去。乃孟夏之月亦殤矣。元伯慷慨激烈。自是燕趙間人。然其事父母極敬謹柔順。或稍不悅。則長跪引咎。必解顏而後起。有疾則日夕戰戰侍藥艾。必有瘳而後即安。其歿也皆病。哭幾絕。葬具皆極豐厚。極華美。部署極稱妮。自其家至葬處數里皆滿。觀者人人歎息。元伯家誠富。然人子孰有不惜費盡心力若此者。人人皆曰孝。且有才。父母既歿。事其叔中書君。猶父母也。待其弟元樞元黯甚友愛。延師教之。皆爲諸生。元伯之孝弟亦足以壽。宜有子。乃殊不然。以元伯之才。

竟不得一第。如千里之馬。舉足見鬚。蹙蹙不得伸。仰天標心而無策。鬱極而通。乃欲讀書談道。樂志塵俗之外。此可謂戰勝矣。而何其遽死也。嗟哉。嗟哉。元伯固未可以死也。而死矣。而血嗣又絕。人人痛心。而況於余哉。元伯生於隆慶四年十月二十八日。享年僅四十二。娶趙同邑趙觀察惟卿之女也。無所出。先卒未葬。至是元樞元黯卜以十一月之七日合葬焉。銘曰。

桃蟲惟鳥。摩空而嬉。鸞鑿其羽。鷄鵲同栖。嗟嗟元伯。竟止於斯。上帝弗察。鬼或妒之。幼子亦隕。厥惟忍哉。莫悲於死。死又何悲。元伯夫也。不愧鬚眉。林類無子。顏淵早萎。善何必福。數亦有奇。中齡不泯。貞珉之辭。

明武學司訓馮公墓誌銘

萬曆三十年三月十八日。獲嘉馮公卒。先是其子元靖以考功主事。較士於楚。被口語歸。所司者廉其枉。然猶改官南都。元靖戀公不出。公素健。不謂輒卒。然元靖以家居得與公永訣。免終天之恨。於是元靖卜葬公有日矣。其弟元獻以狀來。屬趙子爲銘其墓。蓋趙子嘗較士禮闈。得元靖。相與綦懽。因得以交於元獻云。公之卒也。趙子甚傷焉。以元靖仕坎壈。公又背之故。而元靖曰。上知之。罷歸也。公無幾微見顏色。曰。父乃不知子乎。嗟乎。高人哉。公諱效孝。督學易名克孝。解官之後。仍返初名。字必忠。其先揚州如皋人。有名滿者。始遷甯山衛。而屯田獲嘉。滿生仁。仁生禮。禮生春。春生誨。成化中領鄉舉。官臨江倅。誨生世昌。舉正德辛未進士。世昌生鎮。曰一泉。公娶賀氏。生三子。長卽公。次曰效弟。次曰效慈。公天性剛直。意所不服。

卽位勢隆赫。視之蔑如也。氣類符合。單門後進。敬若圭璧。十六補邑諸生。敏而好學。一泉公亦爲諸生。疾惡嚴。與一邑令構。鑄其不法事於直指。令以墮官。而一泉公亦落。於是一時長吏。皆側目。一泉公欲甘心焉。新令吳君至。尤所扼腕。下車卽欲立懂害前令者。會都試。邑諸生覽公文。文乃大奇。則瞳也。旣而曰。是所謂犂牛之子耶。初念稍息。居無何。郡守陳君。司理林君。皆名士。好文。聚屬城雋士考第之。公輒高等。名字益著。繼吳君者爲潘令。潘令以甲科試宰。風采甚峻。公復以文見重。居門下。蓋是時吏於士者。無不知一泉公事。以公有文。羽翮已就。難動。故忍不發。謬重之。而一泉公與令構時。直指面質狀。令銛於辭。以抵一泉公。一泉公出倉卒。不能格。邑有程生者。一言左袒之一。一泉公乃得伸其說。潘令心惡程生。中之於督學。督學行縣。以問諸生。諸生皆知潘令惡之。卻退不敢前。公獨挺身出。言程生無過。督學意解。令緣是噤怒公矣。明年辛酉大比。公以里選第一入試。而潘實分較棘闈。得一良書。意其公也。不肯首舉。又重棄置。乃後之。竟以首副榜。公愈益務學。勤味兼采。不遺心力。文望益高。庚午仍居副榜。秋試凡六。竟不得舉。以歲貢入成均。是時元靖爲安肅令。公便道過之。元靖從容稱觴。因進曰。兒以大人之教爲令。且考績。幸無罪。例得封大人如其官。大人豈有意乎。公曰否否。夫封君者。家居而章服裹之者也。皆之家居。則不若蒞蒞而製荷也。吾猶未老。亦欲薄游以通吾意。畢讀書之事。安能作白衣宦耶。元靖遂不敢復言。越明年。謁選得武學司訓。武學在都中號清閑。易致通顯。元靖所交游。皆海內賢豪。都中貴人。多知馮公者。尤易於

他人公意存吏隱。簡抗自遂。安肅近郡中。元靖時時送易酒至。輒命侶共酌。易酒者。上谷人以易水爲之者也。其清烈無比。公飲之。則想荆軻高漸離之風焉。或勸之造謁諸貴人。曰。吾髮種種矣。豈能俯仰向少年輩乎。公在官二載。而元靖入爲戶部主事。公謂曰。吾已自爲官矣。官者如是耳矣。卽日投牒上官而歸。是時公年六十。入爲子若孫談藝。出課農桑。殊有以自樂也。而里中高士有李公王公者。皆謝仕而歸。與公同調。相厚善。年齒相若。又皆能雄飲。乃爲三老會。月數會。會卽浮大白。敘平生。呼牟祝翻。放歌大笑。窮日徹夜。論者以爲三老人品。與香山洛下諸老同。而逸興靡竭。足以濟勝。殆難其儔。公事一泉公。懷若嚴主。先意承志。能得其懽心。一泉公嬰末疾。已六十餘矣。多方調護。竟愈。歿之日。公且白首矣。哀毀幾不勝喪。及元靖爲官。日進甘脆。每泫然淚下曰。吾曾不能一日養吾親若此也。二弟皆諸生高等。先卒。爲撫其子女。若已出。仲子之子上用。今爲諸生。食廩有名。公旣不屑問家人產。產故簿。又好賑贍親戚。以是資用恆不給。元靖官時。或私餽遺。有所請寄。一切峻拒之。有元靖故吏。感德無能報。以三十金爲太公酒錢。無所求。公謝之。竟不受。然亦不以語人。公異稟厚德。厄於末位。壽僅六十有八。不及見元靖功業之成。而懷大車之憂。有識所共駭歎。然元靖賢妙之價定矣。元獻舉於鄉。名隱隱動遠邇。余一再見元獻。明叡靜穆。必爲大器無疑。天固已知公矣。公生於嘉靖乙未九月十八日。娶張孺人。其父騰蛟。故廩生也。以元靖安肅考績受封。子四。長上知。卽元靖。以安肅令。轉戶部主事。改兵部。旋改考功。娶宋。封孺人。上達。娶花氏。先

卒。上愛妻陳氏。俱增廣生。上賓。卽元獻妻劉氏。繼娶趙氏。庚子舉人女一。適武學生孫思義。孫二。兆麟。上知出。聘高氏。兆魁。上賓出。孫女三。長適楊允恆。上達出。上知上賓各一女。幼。銘曰。冠虎食人。言之則戕。文而免其親。何必我翔。德侍毓祥。厥後以昌。如珪如璋。猗永克顯揚哉。

明故邠州學正王公暨配兩趙孺人墓誌銘

王公以萬厯壬辰六月廿日卒。至於今二十九年矣。今年庚申。王公之子義華。以魏中書汝立之所爲狀。來求銘於余。汝立。余親戚之最善者。亦就世多年矣。余問義華。何以久而不銘也。義華曰。正民沈逢掖中。不能顯揚前人之德。計惟得正人一言。以垂來禩。墓碑則張懋情職方爲之矣。銘以傲於先生。余不佞。不謂義華信重余至此。余曷敢當。然人子之爲其親。孰有如義華者哉。義華。余三徑中人也。夫曷敢讓焉。按狀。王公。柏鄉人也。名振。字子新。別號調臺。曾祖玘。玘生彬。彬生父春。配李。繼賈。賈之生公也。父卒三月矣。先是穿墻中白堊。若玉環焉。衆以爲王氏興之兆。公幼而孤露。資產盡於蠶食。乃奮而爲儒。未幾輒發寤。誦前輩文。能擬之。時汝立之祖魏公。後贈中丞者。方隱授經。學高。公往從之。不能具束脩。魏公曰。余觀子之器業。必能取青紫。異日軒車過吾門而趨。其爲束脩腆矣。旣明習十七年。而未得爲青衿。曰。命也。棄之。去爲賈。學使者方公至。較士極遴選。公復出就試。柏鄉取一人。則王公也。無何爲廩生。每試先人。縣舉德行必推公。令馬公寫。賢者也。雅重之。公長子民和。聘宋尙仁之女。未能娶。有誣尙仁者。馬公爲直之。遂藏

其嘉好焉。秋試屢躋。歲貢入太學。卒業謁選。得萊陽訓導。時有爲匿名帖誹觀察使者。方攔焉震怒。無從得其人。則又有帖云。出母生之手者。觀察使遽欲收之。屬吏咸在。錯愕莫敢出一語。公獨力辨。母生素非爲惡者。且此陰隱事。雖妻子不得聞。他人安得知之。必讎者所爲耳。觀察意頓解。公與人退讓抑默。及母生之事。乃侃侃正言。成觀察之明。排母生之患。衆皆駭服。燕趙間固多慷慨之士。而王公以慍愉藏之。君子哉。當道者甚重之。委署大嵩衛學。視孔廟頽圯。白諸上官修葺之。衛乏才。鄰邑士有冒籍入學者。諸生羣毆之。幾死。公諷諷開諭。莫不愧服。轉延長教諭。三年。轉邪州學正。有鬻子以償逋賦者。公捐俸代輸焉。而席生與張生爭廩。暮夜遺公金。公曰。受若金而喪吾節。何以立諸生之上也。席生靡徙去。三年。轉魯東原王教授。人謂邪訓導馮姓者。忌王公。讒之。公去後。諸生僉舉祀名宦祠。東原王性卞急。嘗欲以私怒致人於死。而故事。王所下令。非教授印不得行。索之。公決不與。王以頭搶地出血。公曰。臣甯得罪於王。不敢枉殺人。得罪於鬼神名教也。其直己守道多此類。居二年。謝政歸。家貧如未仕時。每言吾人尙友千古。卽不能動合典刑。亦當彷彿其萬分一。是以終其身。一介不苟取。跬步不妄動。公娶趙孺人。邑管村趙洪女也。年十四歸公。卽能奉姑嫜。歡然忘貧。公得以專精於學。有姊再醮。恥之。終身不見。早卒。繼娶趙孺人。小荆趙文德女也。治家甚嚴肅。賈孺人老而痿。孺人負之出入。王公輕財而好施。孺人慮其不繼也。從毫銖積至數金。付之其子。出貸取息。買田三十餘畝。王公優游林下者幾二十年。不至饑寒者。孺人力也。老年

尙健。不能暇逸。無病而終。王公生於正德四年。卒於萬厯二十一年。得年八十有五。先配趙孺人。生於正德六年。卒於嘉靖三十一年。得年四十有二。繼配趙孺人。生於嘉靖十年。卒於萬厯四十五年。得年八十有七。子六。女五。孫男十二。孫女六。曾孫男八。曾孫女六。元孫一。夫廣文冷官也。然固多士之師也。稱其爲冷官。斯可爲師矣。今之廣文。每每不安義命。而以諸生爲眷。不問貧富。橫索之。筮楚市詬。無所不至。臨城學之洪姓者。至手斃一諸生。王公誠賢者。斯人豈足爲不肖哉。世之祀名宦者。大率士人用之。媚權要耳。王公以廣文轉左官矣。邪之士俎豆之。公論豈遂絕哉。義華博雅工詞翰。羣游而孤往。有以自貴。卽乞銘之事。可以知其志尙矣。銘曰。

顏稱殆庶。繫惟安貧。凡厥君子。必清其身。嚼乎王公。允爲先民。仕不遭時。屈於廣文。曰官則卑。曰師則尊。行己有恥。聖矩是遵。非仕非隱。庶免素飡。都無所有。而有所存。淑媛助之。萊鴻比芬。旣壽旣考。安於茲墳。

明甯陽教諭郭君墓誌銘

郭君之自甯陽歸也。余見之驚焉。面目奸鰲。行步蹠蹠。神氣蕊然不振也。余竊憂焉。余始爲諸生時。則郭君爲有名諸生矣。君長於余十數歲。然頗相重。且愛之。至老不衰。年來余數與侍御君郊游。命酒。慮君之澁於行。弗相命也。君聞之。每攜酒來。然飲酒不復能多矣。君飲酒故不能多。然當其壯時。每與吾輩飲。輒飛揚。能多飲。蓋郭君倜儻權奇人也。非夫世之魴魴者也。君少而從輝縣公受詩。公以北方罕涉春秋。

者。晚年命其子姓。更爲春秋。君乃從鄢陵公爲春秋。同業者多不解。君得之輒解。爲文多雋語。鄢陵公奇之。而樂城李給事者。公之姪壻。以明春秋舉第一。君又從之游。具得其學。試恆居高等。學使者掄諸生。聚恆山書院。以名士艾謝二先生教之。余與君皆在其中。等輩多升第者。君竟不售。以歲貢起家。或勸之游成均。庶幾得民社。一展其蘊蓄。君曰。資格之棍人久矣。何蘊蓄之能展。且余髮漸顚。安能懷斯事。貴人爲甯吏。隱適吾志焉。謁選得濟陽訓導。濟陽有張治法者。好學而貧。年三十餘矣。君聞之。則衣食之使學。遂爲諸生。復助之娶。已而舉子。君瀕行。治法抱其子叩頭泣曰。非吾師。吾且慮溝壑。而安能爲諸生。而又安能娶而有子。其待士有恩類如此。元學士楊文郁。歿而祭於社。其塋乃敕建者。塚壘十有二。邑猾楊一科。意其多藏。詐曰。吾遠祖也。腰臘拜掃。旣而鬻之有力者。悉發其藏。聚其遺骸總瘞之。將犂爲田。君大不能平。唱諸生白諸當事者。復其地。仍葬之。夫曹褒播譽於射聲。陳寵揚芬於廣漢。皆以掩骼之慈。意符古聖也。豈若郭君還舊墟於枯骨。昭明德之不朽乎哉。此其舉動。豈夫世之齟齬者耶。濟陽之令長吏民。無不稱說感慕。郭君者。微獨諸生。議者皆以郭君之材術。非廣文也。而郭君殊無意爲有司。不求先談。當事者不能薦。在濟陽六年。而轉甯陽教諭。君再任。皆在齊魯之間。齊魯之士。固難爲語文學實行。然皆素聞郭君之誼。愛之如濟陽。無何而感末疾。遂歸。君子謂郭君見幾知命。郭君事父孝。弟詳爲諸生。食廩矣。夫婦暴亡。遺三子一女。君皆子視之。君授徒甚衆。而李一本者。君舅氏之孫也。甫數歲。祖父相繼歿。其祖垂歿。

時有少子呼君至牀下泣曰吾視此僕然者可託惟君耳君來吾可以瞑目矣君爲撫煦教誨皆至成立一本今爲諸生君之高誼每如此君慷慨好振人之急而才足以爲之居非其位歸二年所嬰疾鬱鬱以歿惜哉蓋余猶及見君之父故偶儻權奇人也貌偉聲音鴻朗能飲酒其意恆尙節俠慕賢豪遠近皆敬之稱其字曰郭朝重娶於李生君名訥字汝行別號穎元朝重名良珠良珠之父曰隆隆之父曰守宗守宗之父曰鼎鼎之父曰宣是爲輝縣公之祖鄢陵公者輝縣公之子侍御君之父也余嘗爲鄢陵公志其墓矣故自宣而上者不復書郭君生於嘉靖丙申八月初六日卒於萬曆癸卯七月十九日年六十有八娶劉氏男二長士鰲諸生蚤卒次士鯤諸生娶李氏繼聘陳氏女三一適諸生劉范巖一適歲貢生焦奇思子蕃一適柏鄉諸生魏邦甯士鯤卜以是年十二月之三日葬君於臥龍岡之先塋求余爲銘遵君之末命也銘曰

君之藹也將飛歷紫庭而困在末僚老於談經君之隱也將戲蕩高冥而二豎守之慘弟克興攝僕踰局命實力憎歿而願余銘其墓也余則爲之銘矣

明故浮山縣訓導紹峯張君墓誌銘

萬曆丙申八月八日紹峯張君卒於浮山諱至其子令名號哭數斷絕張君有老母及妻及弟及他子姪男女皆不暇慟張君而交寬譬令名稍蘇乃徒跣走二千餘里至浮山扶柩抵家越明年二月卜葬城東

里許。以張鞏昌伯簡所爲狀來。屬余爲誌銘。蓋君與伯簡兄弟。皆與余成幼厚善。以齒事畜如兄弟。君復遣令名從余學。而君舍我輩已矣。張君名四科。字仲賢。別號紹峯。其父諱瑜。以歲貢爲西平令。有惠政。余猶得見之。溫文君子也。娶李生四維。蚤卒。繼娶李生君。及斷事君四教。君神采明湛。性資英卓。博精史學。文采遒麗。蚤補諸生。卽襲襲超等。聲名日益高。人皆以張君取青紫。真如拾芥。卽張君亦自以爾爾。然有司數不收。初與計偕。賢書將出。西平夜置酒。待以吉語。在商漏竟不至。後轉難之矣。隆慶己巳。學使者莆田陳公。選諸生儁者如千人。聚恆山講堂。令邵武謝先生。平江艾先生師之。數褻序其文藝。君名與余鴈行。然於衆人中。獨推余讓之。明年。余與同學數輩舉於鄉。張君前後計偕者凡九。竟不售。萬厯辛卯。起家歲貢。謁選得浮山司訓。欲不往。以李孺人命往。年餘卒於官。痛哉言乎。當其弱冠馳聲。軒翥思奮。俯視青雲。詎意若此焉已哉。飛將無功。下中封侯。命也奈何。君事親甚能得其歡心。待弟曲盡友愛。姪令德爲市井。誣以大何。君力辨諸當道得舍。有嫠婦盜禾。秉力曳之君前。具道伶俜墊隘狀。君憐之。給粟數斛。其仁心爲質如此。君之訓浮山也。浮山在晉中號無文。君至不踰年。而浮山士翮翮文也。待諸生恩禮俱至。人人悅服。上官令長士民。皆以爲賢。時南樂魏公懋忠撫晉。亦聞而重之。蓋以君非廣文中人。而廣文故聲名孤起如是。君顧念太孺人不置。一日涕泣言於令長。乞休。令長固留之。未幾無疾而卒。諸生號哭。如喪父母。邑中罷市。柩還。士民哭聲震野。諸生段啓光之父政送至君家。痛哭而返。親友迎君之柩。無不痛哭。

者語曰桃李無言下自成蹊以君之才之行官止於廣文無貴賤智愚皆重之其歿也識不識皆痛之何必公卿令名才而好學天其以此償張君矣銘曰

嗟嗟張君而廣文焉矣而遂已焉矣而客死焉矣客既歸止生耶非客爾公爾侯靡暇罔夕厥聲之籍厥後之奕重泉甯闕

明誥封武德將軍淮陽王公墓誌銘

王公名順治字內甫別號淮陽其先常州府武進人有名勝剛者從戎燕山其子禎用靖難功世襲百戶是爲昭信公昭信公子斌征楚五開等處斬獲功多晉世襲正千戶憲皇帝時崇簡王分茅汝南改授儀衛正生鉞鉞生流玉爲郡諸生讀書上蔡謝先生祠出李公遜學門下是時諸名賢如楊公來鳳王公相郭公五常熊公遇相與陶染切直所進甚深其詳載呂仲木碑記中然竟不得志而襲祖職以終生平以例授明威將軍娶張生公七歲母見背繼母史待之弗子公事之如母進無慍色退無怨言雖在孩幼而有閔孺之孝初從鄰山王先生授詩繼從中垣張先生授易以易爲郡諸生學使者陳公試第一食廩直指蔣公試中州士文高者羣之大梁書院教育之公爲汝南第一汝南於中州故才藪公翹秀一時譽望隆起然秋試數落庚午中丞李公直指學使者兩楊公睹其場屋之文皆極口稱賞以爲卽舉無疑乃又不偶遠邇皆惜之又明年明威公卒公以苦學攻文旣成爲名人所賞識而不售於有司命也欲圖再舉

武功爵例不得久曠。祖孫不得相襲。甲戌春。乃謁選大司馬。時太宰李公戴給事兵垣。試公高等。薦之於朝。曰。控弦中的。譚兵中。敘文復爛然可觀。宜咨各行間擢用。人皆爲公稱慶。然公文人。見天下承平久。文吏驕。武弁太專。詘恥之。故謝不往。而甯爲前人之儀衛。崇藩貧國也。儀衛奉簿而文奏多。其費無從出。則稱貸於人。而以軍餉償之。公極意節嗇。毫無浮費。故軍不困而感其德。軍士之缺伍者。必移文其鄉。勾攝之所。蔓引甚多且久。公第於其本伍僉補。卽上官督責之。甘受罰。不忍累良民也。故事。軍較物故者。必相驗而後棺殮。以爲慎重。公曰。父母妻子之手。詎有可疑乎。是使不肖者爲勒索之計耳。第令以物故報。蓋從軍之苦。莫甚於藩衛。公家傳廉惠。是以軍士雖貧。而有樂生之氣。往者藩府之官。惟王之所約束。無與有司。厥後持文墨者。惜葛藟之義。務爲苛撓。直指之白簡及冷官。而鄉曲細人。乘是以竊月旦之權。公乃喟曰。余所不欲之行間者何哉。而以俯項撓腕。持升斗祿耶。遂投劾當道而去。所居精舍曰青箱館。攤家藏之書。徧觀博涉。爲文擬司馬子長。詩喜爲初唐。暇則與諸同志。探名勝。賞嘉節。林游雲觀。或對奕永日。訢訢如也。崇世子尤好文儒。慕公之賢。延之東閣。待以賓師之禮。與山人張不害日陪講幄。多啓沃之益。一切書記。皆出公手。詞華體要。彬彬合雅。嘗督還宮婢。遇士人之家。輒度之。卽非士人。皆惟其所願。不強也。穆汝儻王濟川諸人。終身感悅。壬寅春。會世子薨。無見子而有遺腹。時公病。以鬱痛加甚。至六月間。元孫生。公頓能起。趨府稱賀。無何復生次孫。公以妾媵多副籙。慮他日不利。請封力疾草奏。極其屬思。婉孌

懇惻片言隻字。足爲隕淚傷心。用能感動皇衷。妾媵如數。諸子登於玉牒。公之功也。然自是病日篤。竟不起。公豐碩白皙。居家孝友。與人惟謙惟和。而貫之赤心。族人有名納誨者。性卞急。數聞公勸諭。化而柔良。而納誨早孤。爲其伯兄所侵。卒得保其故業。人皆以公有弄丸之妙焉。公家無餘貲。而好結客。性不能酒。而善釀酒。平生嗜茶。烹法甚精。客至無不盡歡者。自奉甚儉。而恆念人之急。衛所諸生之試於鄉者。賓與之費無所出。公捐俸以成禮。諸生不忍受。公曰。俸亦公家之予也。用之興賢。不亦可乎。故公之卒也。無智愚遠近。識不識。靡不痛悼之。公生於嘉靖庚子正月二十八日。卒於萬曆壬寅九月十八日。年六十有三歲。其子井伯卜。是年十二月三日。葬於城北桃源鋪祖墳之右。求趙子爲誌其墓。蓋趙子嘗爲汝南司理。其時王公正爲儀衛。趙子門人高陵劉貽哲之祖南嵐公爲右史。其父鹽運公寓汝南。貽哲與楊德興韓子瑞趙山甫輩。皆居趙子門下。數稱王內甫雅人也。趙子甚重之。趙子去郡爲郎。王公亦謝儀衛事。及趙子隱鄆上。王公歲相文以精茶餽之。至井伯復以諸生高等襲職。歲事彌篤。公甲戌襲祖職。卽於是年誥封武德將軍。辛丑覃恩。晉階四品。配馬氏。桃源知縣馬公應辰女。生二子。長明汲。卽井伯。邑庠生。襲儀衛銘曰。

猗與王公。郁其有文。脫躡世榮。吏隱王門。曰惟忠孝。罔不克伸。散懷翰墨。栖志煙雲。匪惰而樂。匪抗而尊。邇自乃祖。暨於子孫。龍文相襲。朱邸是闔。自茲興哉。我言維惇。

明文學馮季壯墓誌銘

馮季壯之歿也。遂一年餘矣。季壯兄弟四人。仲昌最先歿。伯亨次之。季壯歿未幾。而叔開隨之。此皆余之少而相親甚懽者。而奄忽殂謝。可不慟哉。季壯之子子劭。卜以今年三月二日。葬於氏莊祖塋之東。持觀察路養虛公之所爲狀。來求誌銘。蓋路公馮之甥。於季壯爲兄。少而從之學。知季壯最真。季壯名嘉圖。別號猗庵。世縣柏鄉。始祖三老公生進。進生剛。剛生昇。昇生敬。敬生達。達生鍾。舉於鄉。爲濮州守。濮州公生余外舅與川公。名時化。是維季壯之父。伯仲皆前母褚出。季壯羅出也。生三歲而父見背。修幹皙顏。性資警敏。母愛之。又憐其少而孤也。有慈無威。十數歲以兩兄之命。從路公學。不督而勤。旣而母又見背。時余爲戶部。乃從余學於京師。其爲文跌宕疎莽。不事微巧。有雄邁之氣。伯亨以書問余曰。季之業何似。余答之曰。駸駸日上矣。旣而爲諸生食廩。然大比連不售。季壯曰。古不云乎。譬如農夫。是穠是菱。雖有饑饉。必有豐年。學豈可以已乎。且不學何爲。愈益精力。然竟不售。先是叔開棄諸生。爲真定標營中軍。時時過家。乘駿馬。束金帶。前驅負簾矢。騁從稱娖。里人榮之。季壯謀於余曰。不肖齒漸長矣。恐淹留無成。及今膂力壯。猶能挽強弓。亦欲爲叔兄耳。安能與兒輩稱弟子員。樞趨學宮以老乎。余謂之曰。今天下久無事。文吏生貴甚。待武弁不以禮。叔開性柔善濡忍。君剛人也。豈能堪其摧笮哉。季壯塞默而退。遂止。而日忽忽不自聊。棄去本業。專爲詩。成卽示余。雄邁如其文。欲以陶寫情志。而沈憂內結。歡悵故少。竟無病而卒。季壯

事母極孝。歿後。孺慕不衰。外祖老而貧。舅氏四人。皆養之。終其身。意氣慷慨。每學校鄉黨。有不平事。輒出正言排擯之。衆皆折服。其才足以有爲。而命運坎壈。馮之先世有積德。濮州公。長厚君子也。余外舅博學能詩文。倜儻自負。僅爲國子。寄雄心於酒。世傳酒史。四十三歿。仲昌舉於鄉第一。才名方籍。三十而歿。伯享有父風。歿於廩生。六十二矣。叔開五十八。季壯五十三耳。積德者久而必興。勤學者久而必遇。獨季壯家不然。其在後之人矣。子劭兄弟。皆好學有文。自茲其昌乎。銘曰。

鸞之將翔。而鍛其翮。青雲在望。翹首騰躡。鬱伊侘傺。白日西夕。下中者侯。終歸幽宅。君今知之。胡爲不憚。明文學郭長公暨配焦孺人墓誌銘

郭長公名憲。字公肅。鹽運公之子也。鹽運公名九貢。其歿也。長公屬余銘其墓。世系具矣。郭氏與余趙爲高邑舊族。世德官緒等。伍蔡之好。劉范之睦。蔑以加焉。余與長公游處時。其子秦階少。距躍治學。或居西山。人莫知者。及長公病。時方煊暑。晝夜侍藥。艾不少咽。親識皆言秦階善病。恐不能堪。而秦階無倦色。如是者五閱月。長公竟不起。秦階號哭幾絕。稍蘇。則學居喪之禮。貫行之。於是人皆曰。秦階非惟好學。蓋孝人也。其孝非今之孝。而行古之道者也。居頃之。謀所爲銘長公之墓者。曰。必夢白先生。或曰。夢白先生不易爲文。且杜門不出久矣。此必不可得。秦階曰。固也。必求之以盡吾心。余頗聞此語。旣而秦階來。詞指甚哀。余曰。以郭趙之世好也。長公之高誼也。其交於余甚篤也。且秦階之巨孝也。思不朽其親。惟余是屬。此

何可辭。鹽運公年逾三十而生長公。尤慈之。能食戒之曰。勿食於他也。自是人食之。卽甘藷弗敢嘗。及從師鼓篋。不好嬉弄。早歲爲諸生上列。屢試於有司。不收。學益精力。遭鹽運公之喪。致哀盡物。無遺憾。繼母劉有子二人。曰霽曰霈。皆幼。霈早夭。今霽爲文學。日上。孝哉友于。若閔騫之無間言。鹽運公歿時。所遺諸物。一毫弗取。宅取小者一區。曰。弟幼不能改作也。霈之產可五千金。絕不爲意。庶母留有女。厚嫁之。塔貧多逋負。代償之。女死。代葬之。而鹽運公之舅氏呂景蒼。繼母之姪劉甲等。皆賴其振業。以慰逝存之心。從兄壘。商城公之孫也。資用不給。鹽運公愛其人。予三百金。令貸息錢。久之無所得。賴其本併贖。時鹽運公逝矣。則以田與長公爲償。長公曰。有田猶不足。削何可支也。不受。旣而壘亦卒。復予其子衷啓五百。有許宗夏者。貸鹽運公數百金。服賈於遼東。偶坐事繫獄。悉以所貸絕之。而致田於長公。受之。曰。是善賈。復給數百。其子自潔。幼勸之業儒。果儒矣。仍還其田。曰。得志無相忘。其好施無厭如此。族生臻死。妻崔哭之。喪明。姑馮虐之。而逐其子。欲嫁之。決。長公助其囊。饋。柏鄉趙潛者。與長公有連。潛死。子幼。族人奪其產。長公收恤之。二氏皆成節婦。又有存孤之功。劉國治者。有名諸生。長公之師也。早世無子。妻王閉守。無外侮。少而師王松郭養正。皆赤貧。生死無捐瘠之患。皆以長公故。其不忘本如此。長公所周人之困。拔人之厄。所爲人娶妻。爲人送死。無論親疎遠近。其蓬飄梗浮而遇者。恆不問其姓名。又捐宅一區。聚童蒙之貧者。爲延師以教之。又修徐家河等橋。以濟病涉者。如此等類。難可具載。長公旣屢試不得志。則爲園於南門。

外泝水之上。移石種竹。求奇花異艸於遠方。插籬開徑。皆有韻致。時余與長公從兄廷尉公皆里居。數相招邀。高邑小城。舉足卽至。至必極飲而罷。四方之詞人俠士。多來高邑者。長公皆傾身下之。恆譙集園中。歌舞管絃。凡可以適客者。靡有所愛。自信陵君湯沐之後。至是而高邑復多客。然得長公而益歡矣。長公之神情氣骨。不類無壽者。乃一病遂不起也。長公所施予既多。又藏鹽運公之事。起門臺。祠關公於其上。及爲園結客。所費不可算數。人皆謂其所蓄積厚。比卒。乃負貸千金。蓋長公當厚施時。其視金錢糞土也。而其智術能散之而復聚之。假令其在。施予終不竭也。余平生愛信陵君之爲人。讀其傳。終日而不倦。其客毛公薛公。當是吾鄉人。毛公博徒也。而劉向別錄。毛公著書九篇。論堅白同異。以爲可以治天下。此豈眞博徒耶。然以爲眞博徒可矣。余嘗嘆燕趙間古多奇士。今何鮮哉。稀也。若長公者。豈可謂非奇士哉。長公外爲疎脫縱任。時游於裙屐少年中。而內實斤斤察察。有所灼見。夔絕塵品者。志屈意隱。天遽奪之。惜哉。長公生於萬厯五年丁丑十月廿七日。卒於泰昌元年庚申十月十八日。得年四十有四耳。配焦氏。趙州焦秉彝女。家世孝謹。克遵內則。生於萬厯七年己卯八月十二日。卒於二十八年庚子五月初六日。得年二十有二。繼配張氏。柏鄉張思韶女。焦生雲峙諸生。卽泰階娶柏鄉李兵馬邦楨女。雲嶂側室李出也。聘甯晉監生賈範女。雲峙一子景福幼。一女字趙州諸生焦啓之子。泰階卜以今天啓元年九月八日。遷孺人與公葬於大營村之新阡。銘曰。

長公慷慨允也。趙人而克用之，以達其仁。有財不蹠，有粟不陳。族里鰥寡，莫或憂貧。廢舉之術，匪求豐殷。其才其誼，覺較是闡。折節禮士，延迎忘劇。中情攸注，喜溢大宅。林庭芳譙，四海嘉客。燕歌趙簫，朝瞰夜月。盪滌情志，崦嵫未迫。殫焉徂謝，何其倉卒。行德不天，有衆悲號。朔風淒淚，閭閻蕭條。魂去何之，塵世難招。人見其和，莫知其超。自非偃佺，俱翳蓬蒿。書此片石，以別賢豪。

明文學張實甫墓誌銘

余聞張實甫之卒也，爲之痛心不勝焉。實甫可謂孝弟忠信者也。其父張仲賢，與余同學，甚相契。命之從余游，其待余甚隆厚。仲賢才士，名高恆山大郡。仲賢於士無所推遜，獨與余密。乃余與諸同學相繼舉於有司，仲賢屢歷，竟以歲貢爲浮山司訓，無幾而卒。丙申之八月也。實甫徒跣二千里，走浮山，扶櫬歸，哭幾絕。當此時，趙之人士無不齋咨歎司訓如許才名，僅爲冷官，又客死。然實甫孝子才高，是必能成其父之志。實甫自髫髻卽好讀書，不與儕輩嬉笑，於聲色博弈之類，一無所好。能酒，然亦非其好也。日惟手一編而坐，或朗而吟，或瞑而思。迅雷霑雨，或不知覺。每以勞致病，則延醫醫之。其父笑而謂之曰：「病不無少輟，何如從容不至病乎？」然實甫直欲以日爲月，厲焯掌之勤，不能節宣勞逸也。故能蚤有聲於諸生間，而又謹言修行，造次不苟。郡大夫至，皆聞其穆行，重遇之，而愈自退藏。卽身家事，足不一履郡朝。實甫父執復有鞏昌張君及弟膠西君，後以軍功贈職方者，皆折節與交，而職方君將之長羅李司馬幕中，征播州楊

叛會則以其子千里。揖子曰：以兒累吾兄督誨之，必不至縱逸廢學矣。揖實甫曰：足下其同胞視之，無使卽於愴淫千里，或有醉飽之失，輒苦言規之。其與人交如此。司訓君之沒也，實甫有大母母俱在堂，內不勝痛，而慮傷兩大人之心，憂憂飲泣，神魂摧盡，而又念勳名之不立，痛先志之未成，久之吐血過斗，猶強飯慰兩大人。壬寅春，長子範墜井死，實甫哭幾絕。明年癸卯春，仲弟令聞醉騎馬墮而死，實甫哭又幾絕。自是病日益深，長愁易怒，不能自持。一夕過周孝廉士元夜談，漏下三商，吐血不止，昇而抵家，竟卒。實甫與人無長幼貴賤，若畏若媚，中有以自守，而無所悟於人家，非有餘，而恆憐人之窘急，盡力周之。是以卒之日，無識不識，皆爲隕涕。實甫之高才好學，能文章，竟以諸生終。又僅僅四十，且屢遭骨肉非常之變，皆求死不得之事，憂毒薰心，其死久矣。第坐以待盡耳，何其不幸如此哉！司訓君但未得科第，非若此也。先是實甫夢王君嘉誥折簡招之，須臾而三，無何入一官寺，見貴人緋衣象笏，坐選著作郎，多所擯落，獨取實甫。實甫降階，見職方君，以大母母在堂，求爲控解。職方君曰：幽明永隔，便自淡然。且君斷不逾三十壽耳。王君有名諸生，與職方君皆先死，而職方君素輕死生，絕類其生平語，異哉！命數一定，其疇能越之？實甫名令名，余見其神氣黯黯熒熒如也。字之實甫，號之練陽，而謂之曰：夫陽也者，明也，健也，明故能照，健故能飛，非練之純而安能若是？實甫竟以幽憂蚤死，蓋萬曆乙巳二月十八日也。距其生嘉靖丙寅七月初四日，僅四十耳。其季弟令望將以是年十二月二十日葬之。其叔父斷事君持侯文學萬鍾所爲狀來。

求余銘。余嘗爲我仲賢兄銘。已不忍捉筆。何知又爲我實甫銘哉。銘曰。

今茲者天。厥道殊古。孰之遂也。而才則偃。孰之壽也。而仁靡祐。見聞孔稔。心焉爲拊。人生今情。亦有攸憮。潛寐斯邱。吁嗟實甫。

明文學劉公墓誌銘

劉公以天啓癸亥三月廿八日卒。疾力時。屬其子昌求誌銘於余。而馮子劬爲狀。今年春。余解官歸。昌與其弟暹來。述公言以請。余不勝痛傷也。劉公。余弟孺卿之兒女姻也。孺卿一步不輕出。一毫不苟取。恆忿疾薄俗。終日閉門讀書。余甚愛之。贈之以詩曰。目中無貴倨。門外絕交游。娶妻強李生。二子八女。其九則側室李出也。劉公爲暹聘其第五女。初以門閥締姻。旣而以意氣趨操。成膠漆之堅。孺卿夫婦在時。而二子五女。相次夭折矣。復聘第六女。孺卿曰。奈吾女尙幼何。劉公不忍舍孺卿。竟聘之。無何而其婦卒。明年孺卿亦卒。蓋辛酉七月廿四日也。所遺第六女及第九女。余撫煦之。攜之京邸。而聞劉公之諱。明年第六女亦殤矣。今見暹之素冠而來也。能不痛哉。劉公名芳遠。字含華。別號桂亭。其先晉陽人也。有名玘者。來隆平。家於小孟村。生得財。得財生雄。雄生雲。雲生朝相。以明經爲蘭陽丞。調新鄭丞。生三子。曰太學。訥。典儀公謙。禮部儒士謨。典儀公。公父也。明智有氣決。倜儻礫落人也。先世固富家。至典儀公而益豐美矣。典儀公以公之貌偉而夙穎也。延師授經。期待之良厚。爲諸生。厲志耽學。典儀公性嚴急。公克歡以順。典儀

公遇事必與公議。偶不合。輒怒。公屏氣斂容。徐察其意。寤。復理前語。曰。此事似應耳。典儀公乃大笑。命酒極宴而罷。典儀公歿。公幾滅性。母趙孺人泣曰。兒不爲我慮耶。乃強進饘粥。母有妹及姪五人。皆貧。公振恤之。待其弟芳聞致美。始終無間。弟有外侮。公攔然奮曰。與其侮吾弟也。甯割刃我之腹耳。侮者詘服。元配李中風疾數作。公伉儷之好彌篤。如賓之敬不衰。此時公已三十。謂李無子矣。而忽舉一子。李歿。竟不復娶。公之長姑。餬口於公者二十年。及歿。值其子客汴。公爲殯之。歲饑。有求賑者。無親疎。咸量給之。或曰。此皆赤貧。必不能償。曰。不貧何乞。責償何賑。公惻心於流冗之轉壑。以其田爲義塚。掩之。里中貧子弟欲讀書者。創爲義學。又施田若干畝。爲館師之需。里人勒石美之。事有不平者。率就公剖質。輸服而退。其以稱貸起爭者。輒爲償之。公平生少病。一病竟不起。縣愒時。握其母趙孺人手曰。兒都無所慮。惟以不得奉養吾母。抱恨入冥耳。遂絕。公頽然無機。其待人雖疎。遜罔弗厚也。雖寒細罔弗敬也。而不可干以非禮。不可驕以富貴。正似吾孺卿而寬大過之。馮子劭之父猗菴公才士。其母公之從姊也。猗菴能酒。每過之。輒飲累日。公不好酒。而好客。尤好嘉客。談笑不倦。興劇亦能豪飲。猗菴不幸早世。公問饋存慰。子劭之母益備曰。吾姊若妹。惟姊在耳。視子劭不啻子姪。曰。是能振家聲而成宅相者也。公生於隆慶二年五月二十日。距其卒得年五十六歲。元配李甯晉太學拱樞之女生子一。卽昌。娶高邑廩生郭霖女。側室顏甯晉顏大成之女。生子三。暹聘高邑庠生郭璧女。晨聘邑庠生成汝志女。畧聘甯晉太學賈範女。昌食廩。暹爲郡

庠生公皆及見之女。一許聘甯晉庠生趙元標。次男昌卜以今年乙丑春三月一日與李合葬於村西之祖塋。銘曰。

世衰俗敝。舊家猶有。直朴恆存。匪時之粗。是生劉公。惟孝克友。身乃兄弟。天其父母。先疇之入。嚮於升斗。以待窮乏。恤其覆曰。雖被凶荒。親鄰相守。村居避喧。蕭閒優受。庭有花竹。園有葵韭。嘉賓至止。罄桓杯酒。爰馬飯僕。惟恐弗久。至性如此。世人有不。余季寡合。於公特厚。結爲婚姻。俱非皓首。二年之間。琪樹俱朽。咸唐預定。蒼素誰剖。古人無數。同歸榛莽。德不必貴。仁不必壽。公與余季。泉臺攜手。道我歸來。無所怨咎。

明敕封胡儒人墓誌銘

胡儒人者。郭華伯侍御之元配也。儒人之父曰仲臣。以年德賓於鄉。飲。儒人少而端靜。不好嬉笑。其祖曰。是女必貴。年十六歸侍御。侍御已爲諸生矣。適母申漬病。父鄢陵公趣爲侍御娶。欲得逮養。娶三日而申。儒人就世。邑家法稱郭爲嚴姑。李儒人待儒人。殊不假辭色。卽至冠珠揚帔。猶衆叱之。儒人事之愈益恭。侍御諸生時。爲文稍不當。鄢陵公意輒譙讓。儒人憂之廢食。侍御愈益發憤。壬午。儒人夢天以墨賜侍御。是秋舉於鄉。明年成進士。授朝邑令。趣迎兩大人。奉養備至。三年上績。封鄢陵公如其官。兩姑及儒人皆。儒人云。己丑。徵爲侍御。姁叔先後輩皆賀儒人。儒人顧不樂。曰。侍御每下郡國卽經年。親老子幼。安用是官爲。其冬入京師。明年。念兩大人移疾歸。壬辰還朝。會倭奴侵朝鮮。聲且內。朝議以經略往。侍御疏執。

不可。謫懷仁典史二年。入爲刑部主事。踰月削籍歸。而母趙卒。明年其父卒。皆侍御爲葬之。情禮俱盡。里中皆嘖嘖。孺人孝如此。詎可謂生女不如男也。又明年。孺人疾作。晝夜不能臥。臥則氣締欲絕。稍愈。則鄢陵公卒。孺人痛哭不休。無復起色矣。孺人執勤出天性。米鹽細碎。必經於懷。出於手。其病時。侍御無遠近。爲延名醫。至卽聞胡孺人勤苦人也。謂須一切無營省。乃可愈。而孺人不能。孺人相待御。和而能敬。事無大小。必以告而後行。父母家有私乞者。曰。吾一錢不敢私與人。若輩不知世上有清濁事。謂居官者皆銅臭。吾家老幼衣食。仰奉入耳。甯有溢耶。孺人卒之明年戊戌。卜以三月二十七日葬於塔兒張村之西。龍岡之原。侍御屬余銘。往侍御言事左遷時。余正在朝。救者甚衆。不能拔。又待命不下。余日日載酒慰侍御。侍御神色自若。其醉態如吾兩人山飲時。侍御稱孺人之言曰。言官固風波也。第恐憂老親耳。可謂達於忠孝之理者矣。閨閣中乃有如此人。宜爲之銘。銘曰。

繫胡孺人之墓也。是其夫名侍御也。仰叩閭闔。進活國之謨者也。是從夫於播越恐懼。琴瑟以娛者也。中道泮合。青雲潛附。往淑可嗣。萬期旦暮。吁嗟乎孺人。

明敕封周母徐孺人墓誌銘

徐孺人者。朝城令周長卿之母也。長卿爲朝城三年。令聞大起。考績稱最。封父松山公如其官。母孺人。兩大人皆迎養宦邸。受寵命。被章服。長卿與其子溥拜於膝下。甚歡也。此辛亥五月也。長卿惟有子溥。年二

十五。明年六月。溥病甚。孺人與之歸。歸未月而溥卒。孺人不勝痛。而又念長卿止一子。而忽夭折。想魂異鄉。不知作何狀。則又以九月之望。促駕東行。六日而抵朝城。母子相見。益不勝痛。六日而病。病四日而卒。嗚呼痛哉。母氏之慈如此哉。是以長卿踊號若不欲生。然念杖桐之義。遵先王之制。抑情自持。久之。卜以癸丑二月初八日。葬於韓村之祖塋。乃請於趙子曰。母棄不肖孤已矣。不肖孤即死。不能活母氏。惟是母氏之淑德懿行。種種可稱述。惟吾師誌而銘焉。以不朽母氏。其事具列於狀。狀曰。周氏世爲趙州人。徐孺人者。州處士徐公臣之次女。處士公。州之富室也。有肥田四十餘頃。周氏田五頃耳。又礪瘠。孺人歸封君。乃朴素節儉。朝夕劬心。此時封君父在。姑李。乃封君之繼母也。封君事之孝。孺人佐之。姑益歡。封君有幼弟二人。皆衣食於孺人。父憐之。欲令析箸。孺人不肯決。曰。是慮婦之勞而怨耶。此自婦職。而乃以埤姑耶。即無爲娶婦矣。父母大賢之。及封君父歿。諸弟皆壯有室。食指繁。乃不得已析箸。封君僅得田百餘畝。而志意疎闊。不屑問有無。又好與里中賢豪游。每至。則肴饌精好。極譙而罷。長卿始鼓篋時。封君督之嚴。孺人曰。是不必嚴。乃躬自紡績。而使長卿讀書其傍。卒業乃退。以爲常。以是長卿學日益進。戊子舉於鄉。家用日饒。封君好施予。以謀之孺人。皆忻然從之。其自奉甚薄。而積以待散。長卿屢困於春官。謁選爲濬縣學博。旣而遷朝城令。孺人戒之曰。令者。民之父母。不愛民。則不可爲父母。慎之哉。長卿退而自矢曰。愛民若吾母之於吾兄弟。庶可免於戾乎。是以朝城之政惠。孺人之化也。趙子曰。長卿兄弟從余學久。知其母

之賢。狀有缺無溢也。人生而爲婦女甚難。以成子姓爲幸。成子姓矣。而以子貴者千百而幾貴矣。其子未必賢也。長卿之爲宰。其鄰邑之君子好之。可不謂賢乎。孺人又何憾焉。銘曰。母胡歿。歿以慈。賢厥子。被蒸黎。百里甯。慈所施。德之榮。簪以著。冠垂珠。德之宜。子之孝。哀靡遺。臚厥美。昭來茲。

明張母郝碩人墓誌銘

郝碩人者。平定州居士張南亭公之元配。孝廉張緯典之母也。父曰南槐公。母趙。舉四男子爲文學。女惟碩人。生而淑慎。四德夙成。父母甚愛重之。郝與張皆以貴雄。而南亭公之父北洲公。與南槐公。以節行意氣相推結。士大夫之賢者。皆與二公游處。故二公爲婚姻。碩人年十六而于歸。姑王。碩人性極。督諸婦晨起賦之事。終日作勞。不得休息。先後或苦之。碩人曰。執勤婦道也。安得自暇逸乎。南亭公於兄弟四人中。最少。碩人後至。善事王碩人。且甚賴其力。王碩人乃歎居歲餘。北洲公捐館舍。南亭公兄弟析居。公性豪儁。不屑言治生之策。而好施於宜。碩人所爲飲食。多方奉王碩人者。如北洲公時。無或缺者。如是者十餘年。家日以瘠矣。伯氏嘗治宅。諧之三百金。南亭公悉撤碩人嫁時步搖簪珥佐之。若遺也。而仲氏與公同宅。其子嘗被逮。欲鬻之以求挺。而富家弗欲其割。公與碩人計。悉以與之。及緯典兄弟漸長。食指多。碩人必不向人稱貸。曰。是安爲鬻緼自棄也者。第俚俚自勞苦。百計生殖。以能不至困拙。久之緯典爲諸生。貧

益甚。至爲胡餅鬻之。取其鬻以餬口。歲丙午。緯典舉於鄉。家漸紓矣。或語碩人。鄉舉與有司頡頏。稍事請託。卽富可立致。不者。猶諸生耳。又奚貴鄉舉焉。碩人笑曰。固也。無如彼不能爲何。旁邑令有惡其富家大慙者。殲而肆之於塗。子弟皆逃匿不敢收。令鑑其意於緯典。曰。必百金乃爲請。緯典佯諾之。爲復其家。終不愛一錢。碩人聞之甚喜。緯典有二兄。皆先歿。以獨子恆依膝下。碩人則從與南亭公。命之去城市。讀書山館野寺中。緯典是以學博且深。顧屢不第。碩人素少病。卽病。不過一二日。嘗病踰月。見若神人者立牖下。俄而愈。至今年春。緯典計偕後遂病。然緯典歸後。猶得侍醫藥者幾兩月餘。縣懷時。所親有以幣樞者。碩人曰。余平生不妄取。再三往。受其直。乃留之。見緯典之不勝痛。曰。勿爾。顯親可也。碩人天性仁慈。聞親戚鄰里中之患。扈困苦者。未嘗不流涕戲歎也。必白之南亭公。振恤之。臧獲之病者。必手爲湯液。飭粥瘳之。仲氏嘗娶婦。不得於姑。幾棄。碩人每代爲裁。紵烹調而進之。姑感其意。卒愛婦。今有孫云。緯典請於南亭公。以某月之某日。葬碩人。屬趙子爲銘其墓。蓋緯典嘗學於趙子。趙子曰。詩三百篇所謂君子。率以稱君公卿士耳。惟樛木之篇。以稱后妃。然則人孰不可爲君子。旣不必丈夫。亦何必后妃也。世人鮮君子。大抵以不安貧之故。且非獨若是也。又求富無厭。鄰碩人乃獨能富能貧。能先富而後貧。能可以去貧。而與貧終其身。可不謂君子乎哉。夫孺人以上。皆國家之封爵。余題母以碩人。碩人者。君子之稱。不爵而貴者也。然文學如緯典。必能顯其親矣。碩人生於嘉靖癸丑三月初九日。卒於萬曆丙辰四月三十日。享年六

十有四子三銘曰。

富貴易得。君子難成。猗與頌人。德象之行。式穀厥子。允迪廉貞。其啜伊何。玉實芝英。其飲伊何。文露華清。隱不爲約。顯不加榮。卜宅於茲。長夜昭明。

明處士端吾史翁墓誌銘

萬曆某年某月某日。史翁卒於家。余聞之。泫然隕涕曰。嗟乎。余小子與諫議君至深。翁猶吾翁也。余每欲一見翁。翁竟已矣。二十八年正月。諫議君家拜太常。北上過余。手張文石儀部所爲狀。屬余曰。先君墓蓋未有誌銘也。以俟吾子。嗟乎。余旣弗得見公也已矣。固願爲之誌銘。以吐其心腹肝膽焉。憶昔己丑之歲。余偶上疏言事。太常君時爲諫議。有同舍上疏駁余。太常君上疏以所駁非是。與時左。安有室誹而市隨者。余二人皆引去。是時余與太常君僅識面也。旣而聞史翁甚喜曰。言官安得不言。貶斥常事耳。嗟乎。人之情皆欲其子一日而耳車。安得有公忠心如史翁者。此余所願見扶服而拜之者也。壬辰。余起家考功。太常君起爲諫議。後余至。明年春。大計京朝官。余得罪削籍。太常君轉都諫。則閉門不出。上疏言時事難救正。及考功無罪。衆救不能拔。臣卽出無益。時尤以余二人爲黨。太常君又引去。蓋太常君成進士。讀中闕書。及爲諫議。至是十餘年矣。未及考績。封翁官云。翁礪礪傲宕。恥齷齪細謹。信心直前。不能孰隨俗譽。意所不可。卽豪貴愈益不附。卽強有力。愈益不詘。甚或唾罵之人。頗以爲難近。然口之所言。胸中都盡。又

能憂人之急。久之皆以翁直人也。事父東橋公。母儲孺人。甚孝。東橋公卒。翁爲諸生不得志。則督其仲弟業儒。無廢前人之業。其季謀析箸。翁泣謂曰。弟狎於諸殯。而謀析箸。吾聽之。是肉吾弟於餒虎也。不可。言已。復季季感悟。翁遂悉以家人產付仲。不問終身不析箸也。儲孺人苦多女。後將勿舉。翁曰。奈何以諸男。餘兩。羸戕天性耶。遂私乳之。長而以字金沙鄧甥。儲孺人則大喜。翁仲父嘗苛督公。翁事之逾謹。適仲父見繫。翁盡力脫之。仲父感而嘆曰。吾乃今而知吾不可無姪也。族有管庫者。鋸虧莫償。邑長吏誅償於族某。不足。斃獄中。蔓施及族人。邑長吏方怒。無敢收其尸者。翁取出殮之。爲償所逋。有奴訐主者。將援翁爲證。翁厲呵之。邑長吏右奴。欲得翁一言爲之地。翁竟不可。主以故得直。持金爲翁壽。翁謝卻之。翁故伉俠。自喜。及見太常君。事親行身。錮錮若畏也。翁乃務爲簡括。有事不自於人者。手書示太常君曰。吾是事誠若爾。旣不自。無庸求直。第爲我白薛君。薛君知之。吾卽負不恨。薛君曰。友人薛敷。教以身也。其畏義若此。太常君家居。奉翁甚懼。獨以未得封爲缺。翁曰。不聞以善養乎。爾不愧其官。榮於吾之有官也。先是太常君初爲諫議時。輒欲有所言。以翁爲念。翁察其色知之。曰。吾業已令爾官。復顧私耶。疏上。言斥貂豎。同年生危之。馳告翁。翁告以語。太常君者。同年生歎服去。蓋翁之委太常君於朝家久矣。太常君三仕三已。得行其志。誠知翁之意也。後其身之寵榮。而成忠以行古之制。此豈與世俗同乎哉。太常君爲世顯人。譙臣不亦宜乎。史翁諱褒德。別號端吾。宜興人也。家東湖濱。遠祖崇漢封溧陽侯。數十傳徙埭而徙史莊。自史

莊徙則居義莊。曾祖廷璇生弼。弼生笈。號東橋公。爲邑弟子。翁之父也。東橋公蓄德行義。遠近嚮之。其所從來遠矣。妣儲孺人。實生翁。配黃孺人。生男四人。長卽諫議君孟麟。娶上舍徐仲女。次仲麟。娶邑庠生萬士裕女。繼娶李某女。次叔麟。娶邑庠生師道傳女。次季麟。娶上舍陳五常女。女三。長適上舍萬哲。次適邑庠生陸經明。季未字。孫男九。堯典聘丹陽姜參政士昌女。舜典聘武進吳參政之龍女。禹謨聘金壇太僕寺寺丞于文熙子邑庠生玉嘉女。湯誥聘同邑浦城知縣儲昌祚女。文謨未聘。俱諫議君出。皋謨聘邑庠生黃某女。稷謨伊訓俱未聘。俱仲麟出。周書未聘。季麟出。孫女四。三叔麟出。一季麟出。俱未字。以萬厯某年某月之吉。葬翁於雲幕之北。翁所自卜也。銘曰。

天福恆象。曰道光明。史翁迪之。厥嗣以亨。以毗王國。匪求我榮。其歿也神。陳佞骨驚。卜云其吉。宅茲休貞。明處士張著甫墓誌銘

余弱冠時。陳幼溪先生督學。都試恆陽之士。取其高等者若干人。集文繹於恆陽書院。而延艾熙亭先生師之。艾先生所最稱許者數人。而余與張仲賢在其中。仲賢長於余。余兄事之。相結極深。仲賢者。張著甫之父也。數人者。皆成進士。而仲賢困於諸生。則著甫之兄實甫。亦諸生矣。命之從余學。仲賢竟以歲貢爲浮山訓導。卒於官。余爲銘其墓。而實甫名如其父。不幸蚤世。余又爲銘其墓。著甫幼失父兄。有母七十老矣。竭力承歡。及撫育諸姑。不暇治經。而教其子達宸爲諸生。又命之從余學。每歲時過余。必與達宸俱。余

曰。達宸來可耳。著甫不肯聽也。蓋著甫念其父兄。故渫過余而不厭。其孝弟之性如此。母年八十。親友賀之。著甫必欲得余文。曰。余父之執友也。比卒。盡哀盡禮。鄉黨稱之。著甫俛俛昂昂似其父。片言跬步不苟。與人處。坦率忘形。傾蓋可信。酒觴頗寬。乃不喜甘輒者。每飲必醉而不亂。其視人之急難。引爲己責。竭力脫之。家非有餘。而恆振人之困。以故鄉黨皆愛重之。紛爭者得一言而解。疑事就之取決焉。著甫痛其家之多難。少而孤露。折節厲行。絕一切紛華靡麗之好。而日教達宸兄弟以讀書。申申諄諄焉戒之。以余欲學而不得。今家務不以累爾。而舍讀書奚事乎。故達宸兄弟皆勤學能文詞。而其馴雅愿謹。非他家輕薄兒比也。著甫腰腹大。善飲食。竟病。痰火昏眩。然所言不亂。瀕危語達宸。求余爲銘其墓。著甫生於萬厯四年三月二十九日。卒於天啓元年閏二月五日。得年四十六歲耳。男三。長箋卽達宸。廩膳生。娶庠生李邦楫女。次籍。聘歲貢生郭治女。次篤。聘庠生張標女。女五。長適隆平庠生黃朱。次適柏鄉庠生李灼。次適甯晉御史馮英子道興。次適甯晉庠生馮琪子道生。次許聘禮部儒士李誠中子之藻。孫一。鵬翼。達宸。卜以九月八日。歸葬。持甯晉馮鍾華侍御之所爲狀來求銘。然余之知著甫甚稔也。銘曰。

勳則有穀。狙亦有冠。曰富貴耳。何必人焉。性質有定。匪俗於遷。世德所染。自宜象賢。賁趾匪車。不冕而妍。其製維芟。其佩維蘭。洵可以封尊於閭閻。積善未艾。壽亦弗延。道如不廢。後嗣其騫。飛鵠去林。避此新阡。

